

EDEN YA SATANA



Beto kulumusa yintu.

Nzambi ya luzolo, beto ke vutula matondo na Nge na nkokila yayi samu na ntangu ya nene yayi, na kwiza dyaka na Nkumbu ya Mfumu Yesu, samu na kukutana na mbeni ya beto, mbeni ya Nge, awa na kilanga ya bitumba, na Ndinga, samu na kunata yandi ntama na kati-kati ya bantu ya Nge, ti bawu lenda mona, na nkokila yayi, Mfumu, Nsemo ya Nsangu ya mbote. Mu ke sambila ti Nge ke pakula meso ya beto na nkisi ya meso, ti ya lendaka vwanda ya kuzibuka na Kieleka, ti beto lenda katuka awa, na kutubaka na kati ya bantima ya beto, “Bantima ya beto vwandaka pela ve na kati ya beto mutindu Yandi vwandaka tuba na beto na nzila?” Belusa bambevo mpe bantu ya mpasi. Pesa kikesa na bantu ya kulemba. Telemisa maboko ya kulemba yina vwandaka ya kulemba mingi. Bika beto tala na Nkwizulu ya Mfumu Yesu, yina beto ke kwikila me kuma pene-pene. Beto ke lomba yayi na Nkumbu ya Yesu. Amen.

Beno lenda vwanda.

² Mu ke meka na kuvwanda nkufi na nkokila yayi, samu ti mu zaba ti mingi me katuka na bizunga ya mutindu na mutindu ya yinsi, samu na . . . samu na lukutakanu, to bikanaka kuna samu na yawu, bayankaka na kati ya beno, mpe fwana kuvutuka, mbala yankaka ba ke kwenda ntama mingi samu na kuvutuka. Mpe mu ke tonda beno. Na suka yayi mu zolaka kuwa Mpangi Neville, munu mosi. Mpe mu me kuwaka yandi bambala mingi, mpe mu me kuwaka yandi ata mbala ve ti mu me sepelaka na yandi ve. Kasi na suka yayi, nsangu me kwisa na ntangu ya mbote, mu zaba ti mu vwandaka na lutwadusu ya Mfumu samu na kuwa yawu na suka yayi. Ya kele mbote mingi! Mpe mu ke mona samu na yinki beno bantu ke zolaka kukwisa mpe kuwa yandi, diaka. Mpe yandi ke salaka beno mbote ntangu nyonso, ya kieleka, na kuwa yandi.

³ Mu vwandaka meka na kukubika mwa masolo ya munu bubu yayi, na suka yayi mpe na manima ya midi yayi. Mu kele dyaka na mingi, mingi, mingi ya kukwenda. Mpe mu . . .

⁴ Na yina, mu ke kwikila, ya vwandaka Jetro tubaka na Moise kilumbu mosi, yandi tubaka, “Ya kele kaka mpasi samu na nge.” Na yina, beto kele na bampangi mingi ya babakala awa yina ke tala mambu ya nge. Mpe mosi na mosi ya yawu kele ya mfunu mingi, mpe yawu kele bima ya mbote yina ba fwana landila mbote. Mpe mu ke tuma pasteur ya beto, to Mpangi Mann, mpe balongi yankaka ya Lukwikilu ya beto awa. Beno lenda kwenda na bawu. Ba ke tuba na beno kaka kieleka kima ya kusala; bantu yankaka, bana ya bawu, yina me kwelana na bantu ya

kuswaswana, to bima yina kele yimbi. Mpe bantu yayi lenda sadisa beno kaka mutindu—mutindu muntu nyonso yankaka, samu ti bawu kele bisadi ya Klisto. Mpe beno kwenda na bawu, mpe mu ke kwikila ti bawu ke—bawu ke pesa beno lusalusu yina beno kele na yawu nsatu. Mu lenda ve kulandila yawu nyonso. Ya kele kaka kulutula mingi, bisika nyonso beno ke kwenda. Ya ke na kufuluka kaka ntangu nionso, beno me mona. Mpe—mpe beno zola kupesa mvutu na mosi na mosi ya bawu, kasi beno lenda sala yawu ve. Kasi mu ke sambilaka ntangu nionso ti Nzambi, na mutindu nionso, ke sala yawu mbote samu na beno.

⁵ Ntangu yayi, na nkokila yayi, beto zola kwenda na Masonuku, mpe kutanga kitini ya Masonuku kuna na Genèse, kapu ya 3; mpe ke vutuka kaka mwa fyoti na bima yina beto vwandaka zonzila, na bantangu me luta, mpe kumona kana Mfumu Yesu ke pesa beto mwa fyoti dyaka yina beto ke zaba ntangu beto ke basika. Mu ke sambila—mu ke sambila ti Yandi ke sala yawu.

Ntangu yayi nyoka vwandaka na mayele ya yimbi mingi kulutula kibulu nyonso ya mfinda yina MFUMU Nzambi kusalaka. Mpe yandi tubaka na kento, Yinga, Nzambi me tuba, Beno ke kudia ve bayinti nionso ya disamba?

Mpe kento tubaka na nyoka, Beto lenda kudia mbuma ya bayinti ya disamba:

Kasi mbuma ya yinti yina kele na kati-kati ya disamba, Nzambi tubaka, Beno ke kudia yawu ve, beno ke simba yawu ve, kana ve beno ke kufwa.

Mpe nyoka tubaka na kento, ya kieleka Beno ke kufwa ve:

Samu ti Nzambi zaba ti na kilumbu yina beno ke kudya yawu, na yina meso ya beno ke zibuka, mpe beno ke kuma mutindu banzambi, samu na kuzaba mbote mpe yimbi.

Mpe ntangu kento monaka ti yinti vwandaka mbote samu na madia, mpe ya vwandaka kitoko samu na meso, mpe yinti vwandaka kitoko samu na kupesa ndwenga, yandi bakaka mbuma ya yawu, mpe yandi kudiaka, mpe yandi pesaka mpe bakala ya yandi na yandi; mpe yandi kudiaka.

Mpe meso ya bawu zole kuzibukaka, mpe bawu zabaka ti bawu vwandaka kinkonga; mpe bawu tungaka makasa ya fiki, mpe bawu salaka mikaba.

⁶ Bika ti Mfumu kubwela... balusakumunu ya Yandi na ntangulu ya Ndinga ya Yandi. Ntangu yayi mu ke zola baka dilongi mosi na nkokila yayi, na yawu, mpe kubokila: *Eden Ya Satana*. Ya kele nzonzolo mosi ya ngolo mingi, ya, Eden

ya Satana. Ya me fwanana, na Lumingu yankaka na nkokila, mu banza, ntangu mu vwandaka tuba na beno awa samu na *Kiyungulu ya Muntu Yina Ke Banzaka*, mpe ntomo ya muntu ya santu.

⁷ Mpe bantangu yankaka mwa banzonzolo yayi ya ngolo ke nataka beto na kima mosi; ya ke nata beto na kulonguka, mpe ya ke nata beno na kutanga Ndinga. Mpe yawu yina mu zola ti dibuundu ya munu nionso kusala. “Muntu ke zinga kaka na dimpa ve, kasi na konso Ndinga yina me basika na yinwa ya Nzambi.” Na yawu, beno tanga Ndinga; beno longuka Yawu. Mpe longuka Yawu na meso ya Nzambi, samu na kupesa lubakusu ya beno ya bantu ya mayele mutindu beto lendaka zinga na kilumbu yayi.

⁸ Ntangu yayi samu na kukwisa, na nkokila yayi, kaka samu na kutuba na beno, samu na kutuba, “Mbote, mu lenda sala *yayi* to *yina*, . . .”

⁹ Mu ke zolaka kutuba na bantu, mutindu mu ke zolaka kuvutuka na yinzo na beno nionso na nkokila yayi. Mu . . . Nzambi zaba ti ya kele kieleka. Mu ke zola kuvutuka na yinzo na mosi na mosi ya beno, mpe—mpe kudya—kudya madya ya suka na beno na suka, mpe—mpe—mpe mu ke basika mpe mu ke zomba bampadi na beno mbasi na manima ya midi, beno me mona. Mu—mu ke zola kusala yawu, kasi mu—mu lenda sala yawu ve. Mpe mu ke zola kuvutuka na yinzo mpe kuvwanda kaka mpe kuzonza na beno; mu ke vwanda na velanda na manima ya lukutakanu, mpe kutuba na beno mwa ntangu fioti, kutuba na beno samu na yina me tadila mambote ya beno mpe samu na Nzambi. Mu ke zola kusala yawu. Babakala mpe bakento na kati awa; Nzambi zaba ti mu ke zola kusala yawu, kasi mu lenda sala yawu ve. Beno me mona, ya kele kaka—kaka na kubenda mpe kidi-kidi.

¹⁰ Mpe—mpe na nsungi ya kidi-kidi yayi yina beto ke na kuzingaka . . . Mpe mu kele muntu ya kidi-kidi, munu mosi. Bubuyayi mu me kuzwa dibanza ya munu ya kusala na kima mosi, “Mu fwana sala kaka yawu,” mpe mbasi ya kele mafuku ya bakilometele ntama na munu; kima mosi me kota na kati-kati mpe me sala *yayi* mpe *yina*. Mpe beno kele na mpasi ntangu nyonso, beno ke meka na kuzwa lembami ya beno.

¹¹ Kasi kisalu ya munu ya ngudi kele kulonga Nsangu ya mbote na Dibundu, mpe kusala nionso yina mu lenda samu na kupesa lukumu na Yesu Klisto na kilumbu yayi, na yina mu kele awa na zulu ya ntoto, mpe wapi ntangu me bikana samu na munu na zulu ya ntoto. Mu me kwisa samu na ku—kumeka kutuba kima mosi na beno yina lenda sadisa beno; kima mosi. Mu me longuka na manima mu me vutuka na yinzo na suka yayi. “Yinki mu lenda tuba na nkokila yayi, Mfumu, yina ke sadisa bantu yina?”

¹² Na kuwaka nsangu yango ya ngolo na suka yayi na... Mpangi Neville me longa beto, pene... Mu banzaka ti ya vwandaka mbote mingi, mutindu yandi tubaka kuna, "Dokotolo ke zaba diambu yango; kasi bakala yina ke kwisa na plato ya kufuluka na bantunga, yandi ke tobola ntunga." Na yina mu banzaka ti ya vwandaka kieleka mwa nzonzolo mosi ya kitoko. Mu banzaka na yawu, "serum, na manima ya dyambu me zabana." Na yawu ya kele kima mosi ya mbote mingi.

¹³ Mu zolaka tuba na beno kima mosi, samu na kunata kima yina ke temuna beno samu na nsilulu ya Nzambi samu na nsungi yayi. Beno me mona? Kima mosi, ya kele ve kima yina muntu yankaka vwandaka na kilumbu yankaka, kasi kima... mpe ntangu... Bima yina kele nyonso ya kulunga; beto nyonso ke talaka na bima yango. Kasi mu banzaka ti mu ke meka na kunata kima mosi na mabanza ya beno, na Masonuku yayi mu me sonika awa, yina lendaka temuna beno, samu na kuzaba, kusala beno soda ya kulutila mbote na kilanga yina beno ke na kunwana na ntangu yayi; samu na kulonguka mayele ya mbeni, na yina beno lendaka kanga bima nionso na ntwala yawu kuma na beno, beno me mona. Yina kele kima ya ngudi, ya kele kulongoka samu na kukeba bankomi ntama ya beno, na mutindu nionso beno lendaka.

¹⁴ Ntangu yayi, beto tala ntangu yayi na ya nene yayi... na mwa minuti fioti, kilumbu yayi ya nene, ya masumu yina beto ke na kuzinga ntangu yayi. Mu ke kwikila ve ti ya me vwandaka ntete na kilumbu yina mu me tangaka ntete na disolo... Ya vwandaka na bilumbu ya kulutila nene ya bampasi, ntangu ba kufwaka bana ya Nzambi bisika nionso. Kasi kumona luvunu ya mbeni, beto me kuzwaka ata fioti ve kilumbu mutindu yayi beto ke na kuzinga ntangu yayi. Ya kele kilumbu ya kulutila mayele ya yimbi, ya luvunu. Mpe ntangu mu ke mona yawu, ya ke nata yayi, ti, Muklisto fwana sala keba mingi bubu yayi kulutila yina yandi vwandaka ntete na konso nsungi yina.

¹⁵ Ntangu yayi, kana beto vutuka na bilumbu ya mpasi nene, yina Rome, vwandaka talisa mpasi na Dibundu, ntangu Muklisto vwandaka sala foti, ba vwandaka fidisa yandi na arène mpe ba vwandaka pesa yandi madia na bankosi, to kima mutindu yina, ntangu bawu monaka ti yandi vwandaka Muklisto samu na kimbangi ya yandi. Kasi moyo ya yandi vulukaka, samu yandi vwandaka mukwikidi ya kuvedila, ya kukondwa mvindu na Nzambi, mpe na kyese yandi kangaka kimbangi ya yandi na menga ya yandi. Mutindu misisa vwandaka basisa menga, to na mabulu na nzutu ya yandi, mpe menga vwandaka basika, yandi ke boka, na lukwikilu ya kieleka, mpe kutuba, "Baka mpeve ya munu, Mfumu Yesu!"

¹⁶ Kasi, ntangu yayi, mayela ya yimbi ya dyabulu ntangu yayi, ke salaka ti bantu kukwikila ti bawu kele Muklisto kasi bawu kele ve. Diambu yawu yina. Beno fwana ve kukanga... Ya kele—

ya kele kilumbu ya kulutila mayela ya yimbi na yina ya zolaka vwanda, na yina beno fwana kanga kimbangi ya beno—ya beno na kupesaka luzingu ya beno. Diabulu me tula mitambu nionso ya yimbi yina yandi lendaka tula, samu. . . Yandi kele muntu ya luvunu. Mpe Yesu tubaka na beto, na Matthieu 24, mutindu kilumbu yayi ke vwanda yina beto ke na kuzinga, kilumbu ya luvunu mingi yina ba me zingaka ntete ve, “ya kubelama mingi ti ya ke vuna Basolami ya Nzambi kana ya lendaka salama samu na yandi na kuvuna.”

¹⁷ Ntangu yayi beto fwanikisa mwa Masonuku, to baprofesi yina ba zonzaka na Biblia, samu na bubu yayi, mpe kufwanikisa yawu na kilumbu yina beto ke na kuzinga ntangu yayi.

¹⁸ Na Timothée ya Zole kapu 3, beto ke longuka yayi, ti profete tubaka, ti, “Ya ke salama na bilumbu yayi, ti bantu ke vwanda bantu ya kunatama, bantu ya lunangu, bantu yina ke zolaka biese kulutila Nzambi.” Beno fwanikisa yawu ntangu yayi, kaka samu na mwa ntangu fyoti. Beto ke ve. . . Beto ke fiotuna kaka yawu, samu ti beto kele na ntangu mingi ve ya kuzonzila yawu nyonso mutindu beto lendaka kubaka yawu konso kilumbu; kasi ya kele kaka samu na kusemisa yawu, na yina beno lenda mona yawu ntangu beno ke vutuka na yinzo mpe beno ke longuka yawu. “Ya kunatama, ya kifuluka na lunangu, bantu yina ke zolaka biese kulutila Nzambi; bawu ke tala ve bantu kyadi, bawu ke zonza mambu ya yimbi na bampangi, bawu ke lenda ve na kukutika banzutu ya bawu, mpe bambeni ya bayina kele mbote.” “Ntangu yayi Mpeve me tuba na nswalu bima yayi ke vwanda na bilumbu ya nsuka.” Ya kele bilumbu yayi, profesi ke na kuzonzaka samu na yawu.

¹⁹ Ntangu yayi beto ke tanga, mpe, na Apocalypse. . . 14, na Apocalypse 3:14, mu zola tuba, Nsungi ya Dibuundu ya Laodicée, ti mutindu dibuundu ke vwanda na kilumbu ya nsuka yayi. Mpe ya ke vwanda, Ya ke tuba, “Ya ke vwanda mutindu mufwidi ya kento mpe ke vwanda na nsatu ya kima mosi ve. Ya—ya vwandaka mvwama, mpe ya kifuluka na bima, mpe zaba yawu ve ti bawu vwandaka mputu, ya mawa, ya kyadi, mpofu, mpe kinkonga, mpe zabaka yawu ve.” Ntangu yayi, beno bambuka moyo, Yandi ke na kuzonzaka na dibuundu ya nsungi yayi, “muntu ya mawa, mpofu, kinkonga, mpe zaba yawu ve.” Nsasa yayi ya nsuka, Ndinga yina ya nsuka, kele yina ke salaka yawu mfunu mingi. Bawu ke banza ti bawu me fuluka na Mpeve, bawu nionso me kubama. Nsungi ya Dibuundu ya Laodicée kele Nsungi ya Dibuundu ya Pentecote, samu ti ya kele nsungi ya nsuka ya dibuundu. Luther vwandaka na nsangu ya yandi; Wesley vwandaka na nsangu ya yandi; mpe Pentecote vwandaka na nsangu ya bawu.

²⁰ Mpe, Yawu tubaka, ti, “Samu ti nge kele mwa-tiya, to madidi to madidi,” ba-émotion ya ngaanda, dibanza ya yintu ya Nsangu ya mbote; “samu,” Yandi tubaka, “nge ke mutindu yina, Mu ke

luka nge na yinwa ya Munu.” Na nzonzolo yankaka, ya salaka Yandi kubela samu na kumona dibuundu na mutindu yina.

²¹ Mpe, beno bambuka moyo, bawu losaka Yandi na nganda; mpe Yandi vwandaka na ngaanda ya dibuundu, vwanda meka na kuvutuka na kati, na Nsungu yayi ya mpasi ya Dibuundu ya Loadicée.

²² Nzambi ya yinza yayi bubu yayi, muntu yina ba ke sambilaka na yinza yayi bubu yayi, kele Satana. Mpe bantu zaba ve ti ba ke sambilaka Satana, kasi ya kele Satana yina ke na kumekula yandi mosi mutindu dibuundu, beno me mona, mutindu dibuundu. Bawu ke sambilaka Satana, na kubanzaka ti bawu ke sambila Nzambi na nzila ya dibuundu, kasi ya kele mutindu Satana salaka yawu.

“Oh,” beno ke tuba, “kasi vingila fioti; beto ke longaka Ndinga.”

²³ Beno tala awa na dilongi ya munu, na nkokila yayi. Satana vwandaka yina longaka Ndinga na Eve, ntete, “Nzambi me tuba,” beno me mona.

²⁴ Ya kele kupesa ntendulu ya yimbi na kitini ya Masonuku yina fwana salama bubu yayi. Yandi ke zabisa beno ti nionso yina Yesu salaka vwandaka ya kulunga. Yandi ke zabisa beno nionso yina Moise salaka vwandaka ya kulunga. Kasi ntangu beno ke baka bansilulu yina Bawu pesaka samu na kilumbu yayi, na yina ba tulaka Yawu samu na nsungu yankaka. Ya kele kaka nyonso yina yandi fwana sala, beno me mona, ya kele kunata bantu na kukwikila Yawu mutindu yina, mpe kaka yina—kaka yina. Na yina, “Beni lenda katula ve Mpova mosi na Yawu, to kubwela mpova mosi na Yawu.” Kasi yawu yina yandi ke sala.

²⁵ Bantu, ke sambilaka Satana, na kubanzaka ti bawu ke sambila Nzambi, mutindu ba ke kebisaka beto na profesi, na Thessaloniens ya Zole, ti...Beto tanga kaka yawu, Thessaloniens ya Zole, kapu 2. Beto baka yawu na mwa ntangu fioti, kana mu lenda, na nswalu nionso, Mu ke zola kutanga yawu. Kaka, mu ke kwikila, Thessaloniens ya Zole, mu kele na Masonuku awa, mpe mu ke tuba:

Ntangu yayi beto ke bondila beno, bampangi, samu na yina me tadila nkwezulu ya Mfumu Yesu... mpe wapi mutindu beto ke vukana kintwadi na yandi,

²⁶ Ntangu yayi, beno me mona, “nkwezulu ya Mfumu, mpe wapi mutindu beto ke vukana na Yandi,” mutindu Nzambi ke vukisa bantu ya Yandi na Yandi na bilumbu ya nsuka. “Kuvukana ya bantu na Mfumu,” na dibuundu ve, “na Mfumu; kuvukana kintwadi na Yandi.”

Beno bika ve ti mabanza ya beno kuma kidi-kidi, to... beno vwanda ve na boma—na boma, ata ti ba zabisa beno na mpeve ve, to... na nsungu, to na mukanda yina

me katuka na sika ya beto, beno ndima yawu ve ti . . . kilumbu ya Mfumu me kuma pene-pene.

Ti muntu mosi ve fwana kuvuna beno na mutindu nyonso: samu ti kilumbu yango ke kwiza ve, ntete bantu mingi kumanga Nzambi, mpe ke monana muntu yango ya disumu (“muntu ya disumu,” beno tala mbote yina yandi kele ntangu yayi), muntu ya disumu ke monisama, mwana ya nzimbani, (yina vwandaka Judas, beno me mona);

Yandi ke telemina mpe ke zangula yandi na zulu ya nionso yina ba ke bokilaka Nzambi, to yina ba ke sambilaka; na yawu yandi ke sala yawu tii na kwenda kuvwanda na kati ya tempelo ya Nzambi na kutuba ti yandi kele Nzambi.

27 Luvunu yina me zimbana dibuundu ya bubu yayi! Beno me mona, “mwana ya nzimbani,” dyabulu. “Mwana ya nzimbani,” dyabulu. Na yina, bantu ke sambila Satana na kilumbu yayi, na kubanzaka ti bawu ke na kusambilaka Nzambi. Kasi ba ke na kusambila yandi na nzila ya credo, na ba-denomination yina me salama na bantu mpe ba-credo ya me nata bantu mbala mosi na luvunu ya kulutula nene yina yinza me zabaka ntete ve. Ata yinki mutindu Ndinga ya Nzambi, silaka samu na kilumbu yayi, me longama mpe me siamisama, bawu ke kwikila Yawu kaka ve. Bawu ke kwikila Yawu ve.

28 Na yina samu na yinki? Beto ke kukiyufula samu na yinki. Samu na yinki ya lenda ve . . . samu na yinki bawu ke kwikila Yawu ve? Ntangu Nzambi tubaka ti Yandi ke sala kima mosi, mpe Yandi salaka yawu, mpe dyaka bawu ke balula mukongo ya bawu na yawu mpe ke kwenda ntama na yawu. Kaka mutindu Eve zabaka ti yina Nzambi tubaka, Nzambi ke sala yawu; kasi yandi vutulaka yandi na zulu ya yawu, samu na kuwa yina yandi zolaka tuba.

29 Beno bambuka kaka moyo, na bansungi yankaka, ya ke vwandaka ntangu nyonso kima mutindu mosi. Na konso nsungi, ya ke vwandaka ntangu nyonso ti Satana ke mekaka na kubebisa Ndinga yango samu na bawu, na kusalaka bawu kumona nsungi yankaka.

30 Beno tala, ntangu Yesu kwisaka, beno me mona, Satana vwandaka na kati ya nkonga ya milongi ya ba-Juif, mpe ba-rabbin mpe banganga-Nzambi, na kumekaka na kutuba na bawu na kuzitisa musiku ya Moise, na ntangu Ndinga ya kieleka tubaka ti na kilumbu yina Mwana ya muntu ke monisama, beno me mona, ti Yandi ke monisama Yandi mosi. Na yawu bawu vwandaka meka, ntangu nyonso na kunata bawu na kuvwanda misambidi, mpe na kukeba musiku ya Moise . . . Beno me mona yina yandi vwandaka sala? Yandi vwandaka meka na kutuba na bawu, “Kitini yina ya Ndinga kele kaka kieleka, kasi Muntu yayi

kele Muntu yina ve.” Beno me mona mutindu yandi ke vuna? Ya kele kilumbu yango ya kieleka ya luvunu.

³¹ Ya me vwanda, mpe ntangu yayi kele, Satana tulaka kimfumu ya yandi na ntoto. Ya kele kieleka samu na yina yandi ke na kusalaka yawu, samu ti yandi zola kutula kimfumu ya yandi mosi.

³² Mutindu muntu ya mumbungu, yina kele Muklisto ve, yandi ke sala nionso yandi lendaka sala samu na kutalisa beno kima mosi ya yimbi. Kana yandi kele na lukanu mosi mpe ndandu ya yandi mosi na kusalaka beno mutindu yina, na kusalaka ti beno kumona yawu mutindu yina, yandi ke lakisa beno nyonso yina yandi lenda, mpe ke nata beno ntama na kieleka ya yawu, samu yandi ke na nsatu kaka samu na yandi mosi. Wapi mutindu yandi ke vuna mpe ke yiba, mpe nionso yankaka, yandi kele na ndandu ya yandi mosi.

³³ Mpe ya kele samu na yina Satana me sala yayi. Mpe yandi me sala na nzila ya ministere samu na kusala yawu, mutindu Nzambi silaka ti yandi ke sala. Ntangu yayi, yandi bandaka na nzila ya luvunu ya misambidi na Eden, mpe yandi me landila kaka mutindu yina.

³⁴ Ya kele ve na nkonga ya ba-communiste. Ba-communiste kele ve na kima ya kusala na yayi. Ya kele dibuundu, ya kele kisika beno fwana tala mbote, beno me mona. Ya kele ve—ya kele ve ba-communiste yina ke vuna Basolami ya kieleka. Ya kele dibuundu yina ke vuna Basolami ya kieleka, beno me mona. Ya kele ve ba-communiste; beto zaba ti bawu ke manga Nzambi, mpe bawu kele mbeni ya Klisto, ya kieleka bawu kele, na ntumunu, kasi ba kele ve mbeni ya klisto *yango*. Mbeni ya Klisto kele musambidi, musambidi ya kieleka, mpe lenda tanga Masonuku, mpe kukumisa Yawu pwelele.

³⁵ Mutindu Satana salaka kuna na mbandukulu, yandi tangunaka nyonso mbote-mbote, “Nzambi me tuba, ‘Nge ke kudya ve yinti nyonso ya disamba.’” Beno me mona, yandi tangunaka Yawu mbote-mbote.

³⁶ Kento tubaka, “Yinga, beto lenda kudia bayinti nionso ya disamba, kasi ya kele na yinti na kati-kati ya disamba yina Nzambi tubaka na kudya ve, samu ti, mpe kusimba yawu ve; samu, kilumbu yina beto ke sala yawu, kilumbu yina beto ke kufwa.”

³⁷ Yandi tubaka, “Oh, ya kieleka beno ke kufwa ve. Kasi bika mu pesa nge kikuma samu na yinki Nzambi tubaka yayi, ya kele samu. . .” Beno me mona, yandi ntangu yayi yinki? Yandi tangunaka Kieleka yayi, beno me mona. Yandi tubaka, “Ya ke zibula meso ya nge, mpe ya ke sala ti nge zaba mbote mpe yimbi. Nge ke vwanda mutindu Nzambi na ntangu yina, kana nge lenda sala yawu.”

38 Ya kele kaka yina yandi zola kusala, mpe ya kele kaka kima mutindu mosi yandi ke na kumeka na kusala bubu yayi. Ya vwandaka na luvunu ya nsambulu kubanda mbandukulu ya kieleka na Eden, mpe kubanda ntangu yina. Na ntangu ya Adam, ya vwandaka luvunu. Na ntangu ya Noé, ya vwandaka luvunu. Na ntangu ya Yesu, ya vwandaka mutindu mosi. Mpe ntangu yayi ya kele mutindu mosi, mutindu mosi, luvunu ya nsambulu!

39 Ntangu yayi, beto ke tala ntoto, ntangu Nzambi vwandaka na yawu na nsi ya luyalu. Ntangu yayi, ntangu Nzambi bakaka luyalu ya yawu. . . vwandaka na yawu na nsi ya luyalu ya Yandi. Na yina, ntangu Satana bakaka luyalu, na kumangaka Ndinga ya Nzambi. Nzambi kilumbu mosi bakaka ntoto na nsi ya luyalu ya Yandi. Yandi tulaka yawu na orbite ya yawu. Yandi tulaka yawu, salaka yawu kusala. Yandi salaka nionso, yandi vwandaka na yawu na luyalu na Yandi. Ntangu yayi beto ke fwanikisa yawu na manima Satana bakaka yawu na luyalu na yandi.

40 Ntangu yayi, ya bakaka Nzambi bamvula mafunda sambanu. Ya bakaka Yandi ntangu yina ve, kasi Yandi bakaka ntangu yina. Mafunda sambanu ya bamvula, samu ba me longa beto ti “kilumbu mosi na Mazulu kele funda ya bamvula na zulu ya ntoto,” mpe ya vwandaka na bamvula mafunda sambanu, to bilumbu sambanu yina Nzambi salaka ntoto. Ntangu yayi, ya bakaka Nzambi bamvula mafunda sambanu samu na kutula yawu, kunaka yawu na bankuna ya mbote mpe yawu butaka landila mutindu ya yawu. Bima nionso fwana buta na mutindu ya yawu. Bankuna ya Yandi nionso vwandaka mbote, mpe na yina ya fwana buta landila mutindu ya yawu. Nzambi bakaka bamvula mafunda sambanu.

41 Na nsuka, ntangu Yandi salaka yawu nyonso, mpe na nsuka beto. . . na nsuka ya kumaka na quartier général ya yawu, ya ntoto, na kisika ya kitoko na esete ya Eden, yina ba vwanda bokila disamba ya Eden. Nzambi salaka quartier général ya yinza na disamba ya Eden, na Egypte, kaka na esete ya disamba vwandaka quartier général.

42 Mpe na zulu ya bima nyonso, Yandi tulaka mwana ya Yandi ya bakala mpe kento ya mwana ya Yandi ya bakala, na zulu ya nyonso ya yawu. Ya kele kieleka. Ya kele yina Nzambi salaka. Yandi tulaka yawu na yisi ya lutumu nyonso. Ba zolaka tuba na mipepe, mpe ya zolaka suka na kufula. Ba zolaka tuba na yinti, mpe ya zolaka katuka *awa* mpe kukwenda *kuna*.

43 Nkosi na yingo vwandaka kudia kintwadi, mpe mwana-dimeme vwandaka lala kuna na yawu. Ya vwandaka na mpeve ya yimbi ve. Ya vwandaka ngemba ya kulunga, na ngwisani ya kulunga, bima nionso na kati ya kulunga, mpe ntangu Nzambi vwandaka na yawu na nsi ya luyalu ya Yandi. Mpe ya. . . beno tala, Yandi vwandaka na ya Yandi—Yandi vwandaka na yinza ya Yandi, Yandi vwandaka na nyonso ya kusala. Yandi vwandaka

na nyonso yina vwandaka kwiza. Bima nionso vwandaka kudia matiti; kima mosi ve zolaka kufwa, kima mosi ve zolaka beba, kima mosi ve zolaka pola. Kima mosi ve. . . Yawu vwandaka kaka ya kulunga.

⁴⁴ Mpe na zulu ya yawu nyonso, Yandi tulaka bana ya Yandi ya luzolo, mwana ya Yandi ya bakala mpe mwana ya Yandi ya kento, bakala mpe kento, samu na kuyala yawu.

⁴⁵ Nzambi sepelaka mingi! “Mpe Yandi kupemaka na bisalu ya Yandi nyonso, na kilumbu ya sambwadi,” mpe lutisaka saba ya kilumbu ya sambwadi yayi samu na Yandi.

⁴⁶ Samu ti, Nzambi talaka yawu nyonso, na manima Yandi vwandaka na bamvula mafunda sambanu na kusalaka yawu mpe na kukubikaka yawu, na kusalaka yawu kukwiza na luzingu; mpe tulaka myongo kuna na zulu, mpe salaka ba-volcan kumata na zulu ya myongo, mpe bima yina salamaka na kati ya bakupasuka ya ntoto; yawu yumaka, mpe kubikaka yawu mutindu Yandi vwandaka na yawu. Mpe ya vwandaka kisika mosi ya kitoko.

⁴⁷ Ya vwandaka na kima ya mutindu yina ve, na ba-paradiso ya nene ya Nzambi! Mpe ba-dinosaure ya nene, mpe nyonso yankaka yina, vwandaka tambula, mpe ya bibulu ya nene; ya vwandaka ve na yimbi na kati ya bawu. Bawu vwandaka kaka ya lembami mutindu mwana ya niawu. Bawu vwandaka na kima mosi ve; ata—ata kimbevo ve, ata mpassi ve; ata nkuna mosi ya kimbevo ve na zulu ya ntoto. Oh, wapi mutindu ya kisika!

⁴⁸ Bandeke ya nene ke na kuyenga-yenga na yinti, mpe Adam lendaka bokila bawu na nkumbu, mpe ba lendaka pumbuka na mapeka ya yandi mpe—mpe ke yimba na dikutu ya yandi. Mpe, oh, wapi kisika ya mbote Nzambi kuzwaka!

⁴⁹ Mpe na yina salaka mosi ya binama ya Yandi na Nzutu ya Yandi Mosi. Nzambi kele na binama na kati ya Nzutu ya Yandi.

⁵⁰ Mutindu, beno kele kinama ya tata ya beno. Mpe, beno tala, beno vwandaka na kati ya nkooko ya nkooko ya nkooko ya nkooko ya beno ya bakala. Kasi, na yina, beto tuba, beto ke baka yawu mutindu nge na tata ya nge. Ntangu yayi, beno zabaka ve kima ntangu beno vwandaka na kati ya tata ya beno. Nkuna ya luzingu ke katukaka na bakala. Bakala kele na cellule ya menga; kento kele na diki; ntangu yayi, na yawu, cellule ya menga kele na luzingu na kati ya yawu. Mpe, na yina, ntangu beno vwandaka na kati ya tata ya beno, ya kieleka beno zabaka kima mosi ve samu na yawu. Kasi, na yina, science mpe Ndinga ya Nzambi ke siamisa ti beno vwandaka na kati ya tata ya beno, kasi beno zabaka kima mosi ve samu na yawu.

⁵¹ Kasi na yina tata vwandaka vingila samu na kuzaba beno. Mpe na kuvukanaka na mama, kuna beno me zabana na tata. Ntangu yayi, beno kele kinama ya tata ya beno. Beno ke tala

mutindu yandi, mpe beno kele na bitini ya nzutu ya beno yina ke fwanana na tata ya beno.

⁵² Ntangu yayi, ya kele mutindu Nzambi vwandaka na mbandukulu. Konso mwana ya Nzambi mpe konso mwana ya kento ya Nzambi vwandaka na kati ya Nzambi na mbandukulu. Beno ke bambuka moyo na yawu ve ntangu yayi, kasi beno vwandaka kuna. Yandi zabaka yawu. Mpe Yandi zolaka ti beno kuma na mutindu ti Yandi lendaka kota na ngwisani na beno, kuzonza na beno mpe kuzola beno, mpe kupesa beno mbote.

⁵³ Beno zola ve mwana ya beno mosi ya bakala . . . Ya kele ve kilumbu ya nene ntangu mwana ya beno ya bakala lenda kwiza na yinzo mpe kuvwanda na mesa? Ntangu yandi ke vutuka na kilanga ya bitumba, to kima yankaka, kidimbu ya mputa, wapi mutindu beno ke yidika madia ya midi, beno ke kufwa mwana-ngombe ya mafuta, to nionso yina, mpe beno ke kubama samu na yandi! Ya kele nsuni ya beno mosi mpe menga, mpe yandi vwandaka na kati ya beno. Kuna beno zabaka yandi ve, kasi beno zabaka ti yandi vwandaka kuna.

⁵⁴ Mpe na yawu Nzambi zabaka ti beto ke vwanda awa, kasi kuna Yandi tulaka beto na nsuni samu ti beto kota na ngwisani. Samu Yandi lendaka kota na ngwisani, Yandi me kuma mosi ya beto ntangu Yandi kumaka Yesu Klisto, Mwana ya Nzambi Yandi mosi, kufulukuka ya kumonisama ya Nzambi. Na yawu yina vwandaka lukanu ya Nzambi, samu na kotalisa binama ya Yandi na kati ya kubundana.

⁵⁵ Ntangu mu vwandaka na tata ya munu, mu zabaka kima mosi ve samu na yawu. Kasi ntangu mu kumaka mwana ya yandi ya bakala mpe butukaka na yandi, mu vwandaka kinama, kitini ya tata ya munu. Mpe beno kele kitini ya tata ya beno.

⁵⁶ Mpe mutindu bana ya Nzambi, beto kele kitini ya kinama ya Nzambi yina vwandaka na kati ya Yandi, yina kumaka nzutu mutindu Yandi kumaka muntu, na yina beto lenda vwanda na kimpangi mosi na yankaka, mutindu dibuta ya Nzambi na zulu ya ntoto. Mpe yina vwandaka lukanu ya Nzambi na mbandukulu. Yinga, tata. Ya kele yina Nzambi zolaka na mbandukulu.

⁵⁷ Yandi vwandaka na bima nionso na nsi ya luyalu. Mpe Yandi balukaka muntu na disamba ya Eden, na kimpwanza ya kusoola; kutuba, “Mwana, ya kele ya nge.”

⁵⁸ Wapi kisika ya kitoko! Nzambi sepelaka mingi, tii Yandi vutukaka kaka mpe pemaka na bisalu ya Yandi nyonso. Konso yinti basikaka ata fioti ve matiti ya bansende mpe bayinti ya bansende. Ata mabaya mosi ve ke katukaka na yinti ya bansende. Bima nionso vwandaka ya kulunga. Bankuna nionso vwandaka ya kulunga. Bima nionso vwandaka na mutindu ya kulunga.

⁵⁹ Na yina ntangu Yandi kwendaka samu na kubaka mwa kupema, mbeni ya Yandi kotaka na malembe na luvunu ya

yandi, mpe bakaka luyalu kuna, na kutendulaka yimbi manaka ya Yandi na bana ya Yandi. Ntangu, Yandi tulaka kivuvu na mwana ya Yandi Mosi; mutindu beno ke tula kivuvu na mwana ya beno ya kento ntangu yandi ke basika na mpimpa na bakala mosi; ntangu beno ke tula kivuvu na mwana ya beno ya bakala ntangu yandi fwana kwenda na mwana-bakala yina ke kunwaka malafu to na mwana-bakala yina ke kunwaka makaya. Beno me mona, Yandi tulaka kivuvu na mwana ya Yandi, ti yandi zolaka sala kima ya yimbi ve, mpe zolaka zitisa konso Ndinga yina Yandi tubaka. Kasi mbeni kotaka na malembe; mutindu mwana-bakala yina na bansuki yina ke ngenga yina ke basisa mwana ya beno ya kento mpe ke sala mambu ya yimbi na yandi; to—to kento mosi ke basika, ke basika na mwana ya nge ya bakala, mpe kima mutindu mosi. Beno me mona, yandi kotaka na malembe. Mbeni ya Nzambi kotaka na malembe mpe tendulaka yimbi Ndinga na Eve.

⁶⁰ Ntangu yayi, yandi, na nzila ya kubwa yayi, ya me salama mpe me baka disamba ya Eden, yandi mosi. Yandi me baka yawu. Mpe ntangu yayi yandi me kuzwa bamvula mafunda sambanu ya lutumu ya luvunu; yandi vunaka bantu, bana ya Nzambi, mutindu yandi salaka kuna. Samu ti, bawu vwandaka ya kuvwanda na kimpwanza ya kusoola, samu na kusala mutindu bawu zolaka. Mpe ke kwikila ti bawu ke sala mbote, to ke tula kivuvu ti bawu ke sala mbote, na yina ba me kwisa na kisalu ya yimbi, mpe ba me tekisa bamuswa ya bawu ya bukuluntu, mutindu Ésaü salaka, samu na yinza. Mpe Satana nungaka yawu, mpe yandi bakaka yawu. Mpe yandi vwandaka na bamvula mafunda sambanu samu na kutunga Eden ya yandi, mutindu Nzambi kuzwaka bamvula mafunda sambanu samu na kunata Eden ya Yandi na kusukisa. Mpe na nzila ya luvunu, luvunu ya Ndinga, to bantu, ntangu yayi tulaka Eden ya yandi mosi na ntoto yayi, na disumu.

⁶¹ Eden ya Nzambi vwandaka ya kusala na kati ya ludedomo. Eden ya Satana kele ya kusala na kati ya disumu, samu ti Satana kele disumu. Nzambi kele ludedomo, mpe kimfumu ya Nzambi kutulamaka na kati ya ludedomo, mpe ngemba, mpe Luzingu. Mpe kisika ya Satana kele na disumu, mpe disumu ya nsambulu.

⁶² Beno tala mutindu yandi vunaka, kuvuna ya yandi, mutindu yandi tubaka ti yandi ke sala. Yandi silaka na kusala yayi. Muntu mosi zaba yawu? Beto baka Esaie, kana beno zola mwa Masonuku yayi. Kana beno . . . Mu fwana tanga mingi ya Yawu, mu banza. Beto baka Esaie kapu 14, na mwa ntangu fioti, mpe beto tala kaka yina Satana tubaka awa, na mwa ntangu fioti. Na Esaie 14, beto ke tanga yawu, mpe beto ke tala yina muntu yayi salaka. Esaie 14, kubanda na nzila ya 12.

*Tala nge me kubwa na zulu, O Lucifer, mwana ya suka!
wapi mutindu ba me losa nge na ntoto, nge munungi ya bayinsi!*

Samu nge me tuba na kati ya ntima ya nge, mu ke mata na mazulu, Mu ke zangula kiti ya munu ya kimfumu na zulu ya bambwetete (ya kele bana), bambwetete ya Nzambi: mpe mu ke vwanda mpe na zulu ya mongo ya dibuundu, . . . na lweka ya node:

Mpe mu ke mata na zulu ya matuti; mpe mu ke vwanda mutindu Nzambi ya mazulu.

⁶³ Ntangu yayi beno fwanikisa yawu awa na Masonuku ya beto yankaka kuna na Thessaloniens, ntama mingi ve, mutindu yandi tubaka, “Yandi kele ya kuvwanda na kati ya tempelo ya Nzambi, na kukizangulaka yandi mosi na zulu ya nionso yina ba me bokila Nzambi, na yawu yandi mutindu Nzambi ke sambilaka mutindu Nzambi na zulu ya ntoto.”

⁶⁴ Ya kele na nzambi ya yinza yayi yina mu longaka na beno na Lumingu me luta. Yandi yayi awa bubu yayi na luvunu, na ngunga yina ya boma, na ntangu yina ya mpasi mingi beto ke na kuzinga. Ya kele ntangu ya kulutila nkembo na bansungi nyonso, samu ti beto ke na kukumaka dyaka na Millenium ya nene; beto ke na ntwala ya Eden diaka. Kasi kaka na nsungi yayi, na luvunu nyonso mpe na ndinga nyonso yina yandi me sadilaka mpe me vwandaka na kiyeka ya kuvuna, yandi me vukisa yawu nyonso kintwadi mpe me kukipesa ngolo mingi yandi mosi; mpe me kulumuka mutindu Nzambi, mpe me kukitula yandi mosi na kisika ya Nzambi; musambidi, mpe lenda tanga Masonuku mpe lenda tuba na beno Masonuku, kaka mutindu Satana salaka na Eve na disamba ya Eden. Kasi beno basika na kisika mosi ya Yawu, nionso yina yandi fwana sala, samu na kusala dibulu yina, kisika malongi ya ndikila ya dyabulu lenda mwangisa, mutindu Kiyungulu ya muntu yina ke banzaka beto vwandaka tubila nkokila yina me luta.

⁶⁵ Ntangu yayi, yandi tubaka ti yandi ke zangula yandi mosi na zulu ya Zulu mingi; yandi ke tomboka na zulu ya matuti mpe bambwetete, mpe yandi ke vwanda kuna mutindu Nzambi, mpe yandi ke vwanda na zulu ya bantu ya Zulu mingi. Mpe yandi me nunga samu yandi kufwa. Kieleka yandi nungaka mingi na kutula bantintisa ya yandi na kusalu, na bantu yina ke bika yandi kutendula, na konso nsungi, mfunu ya Ndinga ya Nzambi yina ba silaka na nsungi yina. Ya kele kieleka mutindu yandi salaka yawu. Na konso nsungi, yandi tendulaka Yawu yimbi.

⁶⁶ Na bilumbu ya Noé, yandi tendulaka ti ya vwandaka mpasi samu na yawu na kunoka na mazulu, samu ti, “ya kele na ata mvula ve na zulu kuna.” Nsangu ya mbote ya yandi ya nene ya science yina yandi longaka na nsaba ya Eden! Yandi lendaka fidisa bisadilu samu na ngonda mpe kutalisa ti ya kele ve na madidi kuna na zulu. Kasi Nzambi tubaka ti mvula ke kwisa. Kasi Satana me nunga, mpe me pesa ndikila na mabanza ya bantu, na nzila ya kusosa-sosa ya bantu ya mayele, ti, “ya

lendaka salama ve.” Kasi yawu salamaka. Nzambi tubaka ti yawu ke salama, mpe yawu salamaka. Yandi salaka yawu.

⁶⁷ Ntangu yayi, na bilumbu ya—ya Yesu, yandi salaka kima mutindu mosi. Yandi pesaka dyaka ndikila na mabanza ya bawu na luvunu, beno me mona, na kutendulaka yimbi Ndinga. “Kana Nge kele Mwana ya Nzambi, ntangu yayi bika mu mona Nge kusala kima samu na yawu.”

⁶⁸ Yesu kwendaka ve na kusakana samu na yandi. Yandi salaka yawu ata fioti ve. Nzambi kele ve kusakana. Yandi kele ve na nsatu ya kupesa mvutu na kima yina Satana ke lomba. Yandi vwandaka kaka . . . Yesu tubaka, “Ya kele ya kusunama, ‘Nge ke zinga ve. . . Muntu ke zinga kaka na dimpa ve, kasi na konso Ndinga yina basikaka na yinwa ya Nzambi.’” Beno me mona, Yandi lendaka ve kusakana, na yandi. Yandi zolaka ve kusala dimpa. Yandi lendaka sala yawu, kasi Yandi zolaka kuwa dyabulu, na yina Yandi kuwaka ve dyabulu.

⁶⁹ Mpe dyaka ya kele disumu ya nsambulu, mutindu na mbandukulu, ya luvunu mingi. Beno tala yawu mbote ntangu yayi. Ya kele kaka ve disumu ya ntama ya mbote ya konso kilumbu, kusala pité mpe kukola malafu, mpe kusadila Nkumbu ya Nzambi na mpamba. Ya kele yawu ve. Ve.

⁷⁰ Beno ke bambuka moyo na bamvula me luta, mingi na kati ya beno awa, biboba ya beno, beno ke bambuka moyo na dilongi yina mu longaka, na, *Bakyadi Na Lufundusu*. Kento ya kindumba, yandi ke vwanda ve na kyadi kuna. Yandi zaba kisika yandi ke kwenda. Kinwa-malafu ke vwanda ve na kyadi kuna. Muntu yina ke tekaka malafu ya mayuya, muntu ke bulaka nsaka ya mbongo, muntu ya luvunu, muyibi, yandi ke vwanda ve na kyadi. Kasi, muntu yina ke banza ti yandi kele ya kusungama, beno tala kyadi.

⁷¹ Ya kele muntu yina, ke tuba, yina ke kwiza tuba, “Mfumu, mu longaka ve Nsangu ya mbote, mu basisaka ve bampeve ya yimbi, na Nkumbu ya Nge?”

⁷² Yesu tubaka, “Kwenda ntama na nge. . . kwenda ntama na Munu, nge yina ke salaka disumu ya nkú. Mu me zabaka nge ata fioti ve.” Yina kele kyadi, beno me mona, luvunu yayi.

⁷³ Yawu yina mu ke vwandaka ntangu nionso . . . yawu yina ba ke bakulaka munu mbote ve. Ya kele ve ti mu zola kuvwanda ya kuswaswana. Mu zola ve kuvwanda ya kuswaswana, kasi mu fwana vwanda ya kusungama. Mu ke na Nsangu, mpe Yina fwana kwenda na bantu. Ba ke bakulaka Yawu mingi na mutindu ya yimbi na kati ya bantu. Ba ke banzaka ti mu ke teleminaka bantu nionso. Ba me zaba kaka, mu kele samu na bantu nionso, mpe ke meka na mutindu nionso na kunata na bawu yina kele Kieleka, kaka mutindu Yawu kele na ntima ya munu mpe mutindu Yawu kele na kati ya Biblia awa. Mpe Nzambi ke siamisa ti ya kele Kieleka, na yawu ya kele ve na

kima yankaka yina lendaka salama samu na Yawu. Na yawu, ba ke tala Yawu, to ba ke sala yawu ve.

⁷⁴ Beno me mona, bawu zola ve kumona Yawu, samu ti bawu me tekisaka yimeni, me tekisa bukuluntu ya bawu na organisation mosi, na denomination mosi; samu na kumeka bukuluntu ya bawu, samu na kukuma na Mazulu na zulu ya lufulu ya nsambulu mosi ya kubongisa, yina Satana kele mfumu ya konso kitini ya yawu. Nzambi ata mbala mosi ve kuzwaka nsambulu ya kubongisa, ata mbala mosi ve. Mpe bawu ke kukitekisa na yawu, kisika bawu, nkonga ya bantu, ke tendula Ndinga mpe ke tuba Yawu zola tuba *yayi* mpe Yawu zola tuba *yina*.

⁷⁵ Nzambi kele na nsatu ya mutendudi mosi ve. Yandi ke salaka ntendulu na Yandi Mosi. Yandi ke na nsatu ya muntu yankaka ve samu na kutuba na Yandi mutindu ya kusala yawu. Yandi kele na kimpwanza ya nene. Yandi tubaka mutindu Yandi ke sala yawu, mpe ya kele mutindu Yandi fwana zitisa Ndinga ya Yandi. Ntangu Yandi tubaka, “Bidimbu yayi ke landa bayina ke kwikila,” Yandi zolaka kaka yawu. Nionso yina Yandi tubaka ke salama, Yandi tubaka ti ya ke salama na bilumbu yayi ya nsuka, ti Yandi ke sala bima yayi, mpe Yandi salaka yawu. Yandi fwana yufula muntu mosi ve kana ya kele ntangu to ve. Yandi zaba yinki ntangu kele, mpe yinki dikani kele.

⁷⁶ Ntangu yayi, Satana, muntu ya luvunu yayi, mutindu tubaka na Matthieu 24:24, na luvunu mingi. Ntangu yayi, beto ke tala yawu na nzila ya manaka ya nsangu ya mbote ya luzabu, ya lukolo ya nene, bandongosolo ya zulu mingi, civilisation, mpe nyonso yina, me loka bantu yina zola kusadila Nzambi, na kukwikilaka luvunu ya yandi.

⁷⁷ Eve zolaka ve kusala yawu, kasi yandi lakisaka yandi mutindu ya vwandaka na ndwenga mingi na kati ya yawu. Yandi zabaka ve; yandi vwandaka zola kuzaba. Yandi bakulaka ve, kasi yandi vwandaka zola kubakula. Mpe Nzambi tubaka na yandi ve na kumeka na kubakula.

⁷⁸ Wapi mutindu mu lenda bakula mosi ya bima yayi? Mu lenda bakula yawu ve. Mu ke kwikila yawu. Mu ke bakula yawu ve. Nzambi kele lukwikilu, mpe beto ke bakula ve. Beto ke kwikila kaka yina Yandi tubaka.

⁷⁹ Ntangu yayi, beno fwanikisa Eden ya Nzambi na ntangu yayi, na manima ya bamvula mafunda sambanu ya kubebisa lutendulu ya kieleka ya Nzambi yina ba silaka na nsungi. Beto fwanikisa yawu ntangu yayi, mpe beto mona kisika beto me kuma. Mutindu yandi salaka na dibuundu na—na ntangu ya Klisto, na Yesu, na kumekaka na kubumba—na kuvutula bana ya babakala ya kukwikama ya Nzambi na kuzabaka Kieleka. Yina kele ya Nzambi. Nzambi tulaka bana ya Yandi ya babakala awa, binama ya Yandi, samu na kubundana na Yandi na kuwaka Ndinga ya Yandi.

80 Yinki ke salama kana tata ya beno me tuba na beno, mpe beno kele mwana ya kieleka samu na tata ya beno, mpe yandi tubaka na beno, “Mwana, kukota ve na masa yina kuna, kuzenga masa, samu ti ya kele na bangandu na masa yina”; mpe muntu mosi vutukaka, yandi tubaka, “Ya kieleka, na masa ya kitoko mutindu yayi, ya kele ve na bangandu na kati ya yawu”? Ntangu yayi nani beno ke kuwa? Kana beno kele mwana ya kieleka, beno ke kuwa tata ya beno.

81 Mpe mwana ya bakala to mwana ya kento ya kieleka ya Nzambi ke bakaka ntete Ndinga ya Nzambi. Mu ke kipe ve yina muntu yankaka ke tuba samu na yawu, ba ke baka ntete Ndinga ya Nzambi. “Ya kele na ndikila na mbungu,” mpe ba ke kwikila yawu.

82 Na kuvwandaka na lukwikilu na Ndinga ya Yandi nyonso, Bankuna ya Yandi, nataka Eden ya busantu, ya zola, mpe ya Luzingu ya Kukonda nsuka. Ya kele yina Eden ya Nzambi basisaka, busantu. Mpe ya nataka Eden ya busantu, ya zola, ya lubakusu, ya kulunga, mpe ya Luzingu ya Kukonda nsuka. Yawu yina Nzambi ke kuna: Ndinga ya Yandi, Nkuna ya Yandi. Ya kele yina Dibuundu ya Yandi ke vwanda na nsuka; Yawu ke vwanda kima mutindu mosi.

83 Beno tala, beno tala dibanza. Beno zimbana yawu ve. Mu ke kuma na yawu kilumbu yankaka to na Nsangu mosi yankaka. Kasi, beno zaba, Nzambi tubaka, “Bika ti konso nkuna kubasisa na mutindu ya yawu.” Yina kele musiku ya Nzambi? Ntangu yayi wapi mbote mulongi nyonso kele, to muntu nyonso yankaka, beno meka na kusala Ndinga yango kutuba kima yankaka? Beno me mona, konso Ndinga ya Nzambi kele Nkuna. Yesu tubaka yawu, “Nkuna yina mukuni mwangisaka.” Na yawu kana Marc 16 kele Ndinga ya Nzambi, yawu ke buta landila mutindu ya yawu. Kana Malachie 4 kele Ndinga ya Nzambi, ya ke buta na mutindu ya yawu. Mpe konso nsilulu yankaka fwana buta na mutindu ya yawu.

84 Beno me mona, beno me mona Satana awa ke na kubumbama? Yandi ke na kumeka na kutuba, “Ya kele ve mutindu yina, ya kele ve mutindu yina.” Beno me bakula yawu? Beno me mona, Satana ke tuba, “Oh, Yina kele ve samu na kilumbu yayi. Ti, yina—yina kele. . . Yina vwandaka mbala yankaka. Yina, yina zola tuba mpe yawu ve.”

85 “Konso nkuna fwana basika na mutindu ya yawu.” Ya kele mutindu Nzambi tulaka Eden ya Yandi. Ya kele kieleka?

86 Mpe yawu yayi: Ya kele mutindu Nzambi tulaka Dibuundu ya Yandi, konso Ndinga na manima ya mutindu ya Yawu! “Muntu ke zinga kaka na dimpa ve, kasi na konso Ndinga ke basika na yinwa ya Nzambi.”

Beno me mona? Satana, yandi ke baka kima yankaka, kasi Nzambi tubaka, “Konso nkuna na manima ya mutindu ya yawu.”

⁸⁷ Kana nsilulu tubaka, “Bidimbu yayi ke landa bayina ke kwikila,” ntangu yayi dibuundu me tuba, “Kota na dibuundu. Tanga credo. Zaba katekisima.”

Ya kele ve na bima ya mutindu yina na kati ya Biblia ya muvimba.

⁸⁸ Kasi Yesu tubaka, “Bidimbu yayi ke landa bayina ke kwikila: na Nkumbu ya Munu bawu ke basisa bampeve ya yimbi; bawu ke tuba na bandinga ya malu-malu; kana bawu simba banioka, to bawu kunwa manganga ya yimbi, yawu ke sala bawu yimbi ve; kana bawu tentika maboko ya bawu na zulu ya bambevo, bawu ke beluka.” Nani kele muntu samu na kumanga Yawu? Beno me mona?

⁸⁹ “Konso nkuna ke buta landila mutindu ya yawu.” Kana beno kele nkuna ya Nzambi, kosalu, mwana ya Nzambi, na yina Ndinga ya Nzambi me kuna na kati ya beno. Beno me mona? Mpe na yina ntangu beno ke kuwa Ndinga ya Nzambi, “Mameme ya Munu ke kuwa Ndinga ya Munu; bawu ke landa ve nzenza.” Beno me bakula yawu? Na yina, “nkuna nionso ke basika na mutindu ya yawu mosi.”

⁹⁰ Ntangu yayi beto ke mona, ti konso nkuna ke na butaka na mutindu ya yawu, ya vwandaka ve na lufwa na ya malu-malu . . . na Eden yina. Ya ke vwanza ve na lufwa na Eden ya malu-malu. Beno me mona, ya vwandaka ve, na kima yankaka ve kasi busantu, kuvedila, mpe Luzingu ya Kukonda nsuka.

⁹¹ Ntangu yayi, na nzila ya kukondwa lukwikilu na Ndinga ya Nzambi, me kotisa nkuna ya mvindu na Eden ya Satana. Beto ke na kukotaka ntangu yayi na kisika Satana ke na kubakaka kiti ya kimfumu, mutindu mbeni ya Klisto, na Eden ya ntoto yayi, Eden ya disumu, nsambulu ya kubeba. Yandi bandaka ve, “Mu kele Satana. Mu kele wanzio ya nene.” Ve, na zulu ya yawu ve, kasi na zulu ya kubebisa Ndinga ya Nzambi. Mpe ya kele mutindu yandi ke nataka kimfumu ya yandi, na konso nsungi. Mpe ntangu yayi na nsungi ya luvunu ya nene yayi, me yilama na kubaka kiti ya yandi ya kimfumu, na bantu ya yandi! Yandi me tunga yandi mosi Eden ya mayela, ya kulongoka, ya science; kieleka, milongi ya science, dibuundu ya science, théologie ya science, nyonso kele ya science. Bima nionso kele na zulu ya luzabu. Dibundu ya muvimba me tungama na zulu ya luzabu. Ya me tungama ve na zulu ya lukwikilu.

⁹² Kilumbu mosi mu kwendaka kuna samu na lukutakanu ya dibuundu ya muntu mosi. Ya vwandaka kivinga mosi ya nene na weste. Muntu ya mbote, mpe yandi mangaka bima yayi yina beto ke na kuzonzila. Kasi dyaka, yandi vwandaka . . . Mu zolaka yandi; bakala mosi ya mbote, ya kiboba. Ntangu dibuundu ya

yandi basikaka . . . Ya vwandaka pene ya mafunda sambanu ya bantu. Ntangu dibuundu ya yandi basikaka, na lukutakanu ya manima ya midi, na kutala bankama kumi na tanu, bawu nyonso vwandaka ya kulwata na mayela ya mbote. Mu vwandaka kuna mpe vwandaka tala bawu.

⁹³ Yandi longaka dilongi mosi ya mbote, muntu yina salaka. Mpe na yina yandi yufulaka kana muntu mosi zolaka kundima Klisto; kaka kutelemisa maboko ya bawu. Mpe muntu mosi ve telemisaka maboko ya bawu. Mpe na nsuka kento mosi telemisaka maboko ya yandi. Yandi tubaka, “Mbote mingi, ntangu yayi nge kele Muklisto,” mpe lutisaka yandi na mbotika. Mpe kuna ntangu yandi basikaka . . . Yandi biekaka bébé mosi, yandi yambaka bébé ya fioti mpe salaka kisambu samu na yandi, mpe yandi yambulaka nkonga ya bantu.

⁹⁴ Ntangu dibuundu ya yandi basikaka, bantu nyonso ya mbote, ya mayele, ya kulongoka. Na yina mu vwandaka ya kutelama pene-pene, samu na kupesa mbote ya bakala yango mpe zolaka siansi ya mbote samu na yandi, na yina yandi vwandaka basika.

⁹⁵ Mpe ntangu mu salaka yawu, awa kwizaka nkonga ya munu. Ba lendaka ve kubika bawu na yina bantu ya yandi vwandaka kuna. Awa me kwiza ya munu, na ba-fauteil roulant, na ba-brancard, na ba-camisole de force, bantu ya kulawuka, mpe nyonso yankaka. Beno me mona luswaswanu? Yawu yina. Yawu yina kima mu ke tubila, beno me mona. Beno me mona, ya kele kima ya kuswaswana.

⁹⁶ Na yina, na nzila ya luzabu ya science beno lenda sala Nsangu ya mbote *yina ba ke bakula*, ti, beno, “yandi yina ke kwikila na Yesu Klisto ke kuzwa ve kitumbu,” beno me mona.

⁹⁷ Kasi, “Bidimbu yayi ke landa bayina ke kwikila,” beno me mona, yandi ke kondwa na kutula Yawu na kati kuna, beno me mona. Yandi kwikilaka na Yesu Klisto, yandi me vuluka, kana bidimbu yayi ke landa mukwikidi.

⁹⁸ “Mpe yandi yina ke kuwa Ndinga ya Munu,” yandi ke basika kaka ve, yandi ke kuwa Yawu ve na makutu ya yandi, kasi, “ke bakula Yawu.” Muntu nyonso lenda kuwa Yawu; kento ya kindumba lenda kuwa Yawu mpe kuvwanda kento ya kindumba; beno me mona, kinwa-malafu lenda kuwa Yawu; muntu ya luvunu lenda kuwa Yawu mpe dyaka kubikana muntu ya luvunu. Kasi, “Yandi yina ke bakula Ndinga ya Munu, mpe ke kwikila na Yandi yina fidisaka Munu, kele na Luzingu ya kukonda nsuka.” Beno bawu yayi, beno me mona.

⁹⁹ Mpe muntu ve lenda sala yawu kana ti Nzambi solaka yandi na ntwala. Yesu tubaka, “Muntu mosi ve lenda kwisa na Munu, kana Tata ya Munu me benda yandi ve, mpe bayina nionso Tata pesaka Munu ke kwisa na Munu.” Amen. Ya kele kimpwanza ya nene nyonso mpe luzabu ya ntwala ya Nzambi. Yandi ke zinga

yandi mosi mpe ya kele na muntu ve yina ke tuba na Yandi yinki ya kusala.

¹⁰⁰ Ntangu yayi, na nzila ya kukondwa lukwikilu, na kubakaka ve Ndinga nyonso ya Nzambi, me nata nkuna ya kukondwa lukwikilu, ya kukondwa busantu, ya kufuluka na disumu, ya kuyina, mpe lufwa ya Kukonda nsuka kele na nsungi yayi ya masumu, ya dibuundu ya mayela. Ntangu yayi beno me bakula yawu? Na kilumbu yayi, ti ntangu yinza ya muvimba kele misambidi! Beno zaba yawu? Yinza ya muvimba kele misambidi. Mpe na nsungi yayi ya nsambululu, mabuundu ya nene na konso nsongi; nionso, nionso yina ke nata na kusambilaka Satana. Yawu yayi, kaka awa na kati ya Biblia. Ya kieleka. Mpe na baseminere ya mayela yayi, ya théologie yina me basisa muntu ya mayela yina me longukaka mutindu ya kuzonza, yinki ya kusala, mutindu ya kusala ba-émotion ya bawu, mpe nyonso mutindu psychologie, bamvula tatu mpe yiya, samu na kuzaba mutindu ya kusala na dibanza ya muntu. Beno me mona, ya kele. . .

¹⁰¹ Mpeve ya Nzambi kele ve kima yina, beno, beno ke kuzwa na lukolo. Ya kele kima yina ba soolaka ntete na kati ya beno, na diboko ya Nzambi ya Ngolo nyonso. Banzingilu ya beno lenda vwanda ve ya lukolo to yina ba me longusa yawu na beno. Ya kele yina ba soolaka na ntwala, na diboko ya Nzambi mpe luzabu ya Nzambi, na kati ya beno. Ya kele kieleka.

¹⁰² Ntangu yayi, ya me basisa Eden yayi ya nene yina bawu ke na kuzinga ntangu yayi na kati, Eden ya dibuundu ya yinza. Bawu nionso ke na kuvukanaka kintwadi ntangu yayi na Lukutakanu ya nene ya Oecumenisme, mpe bawu ke vwanda na dibuundu ya yinza nyonso yina ke kwiza na yisi ya yintu mosi, kisika Satana ke baka kiti ya kimfumu, ya kieleka.

¹⁰³ Mpe mbokolo ya nsuka ke basika, samu na kuzwa Kento ya makwela ntete Yandi kota na yawu. Samu ti mbala mosi na yina, yandi me baka kidimbu ya kibulu, mpe me kuula, yandi ke basika ata mbala mosi ve na yawu. Ya kele samu na yina, beno tuba, “Beno basika na kati-kati ya bawu, bantu ya Munu,” ntete yawu kukota na yandi, beno me mona. “Beno basika na kati ya bawu, mpe beno vwanda ya kukabuka.”

¹⁰⁴ Ntangu yayi, kuyina mpe lufwa, mpe nkabwani ya Kukonda nsuka na Nzambi, na Eden yayi; bansatu ya yimbi, busafu, kubeba, (wapi mutindu?) na kukunaka nkuna ya yimbi.

¹⁰⁵ Mu ke bambuka moyo na vision yina mu monaka ntete mu kutana na bantu ya Pentecote, ya Muntu yina ke kwenda na yinza ya muvimba, na pembe. Beno me kuwaka munu kutuba yawu bambala mingi. Mpe muntu mosi kwisaka na manima ya Yandi, mpe kunaka bankuna ya luswaswanu.

¹⁰⁶ Kasi yandi bakaka yawu na mutindu ya mbote, na Eve. . . na disamba ya Eden, na nzila ya kulula ya Eve samu na disumu;

samu na kulula Eve, ya disumu. Na yina, kana Eve kulula luzabu, ya vwandaka disumu.

¹⁰⁷ Mpe ntangu beto ke lula luzabu, beto zola Doctorat ya Philosophie, Doctorat ya Droit, ya kele disumu na kusala yawu. Yina kele malabu ya ngolo, kasi ya kele Kieleka. Ata mutindu ngolo ya kele, ya kele dyaka Kieleka, beno me mona. Samu na kulula luzabu, lubakusu!

¹⁰⁸ Kima ya yawu kele, kele, bubu yayi beto ke meka ve na kutula Ndinga ya Nzambi na kati ya bantima ya bantu. Beto ke na kumeka na kukitula beto mosi. Mabuundu ke na kumeka na kutula malongi ya dibuundu, na kati ya ntima ya muntu.

¹⁰⁹ Ba me tuma beto na kutula Ndinga ya Nzambi. Paul tubaka, “Mu me kwiza ve na beno na bandinga ya luvunu ya muntu, ti lukwikilu ya beno lendaka vwanda na luzabu ya muntu; kasi mu me kwisa na beno na ngolo, na kumonisama ya Mpeve-Santu, ti lukwikilu ya beno lenda pema na Nzambi.” Yawu yina.

¹¹⁰ Muntu lendaka ve kukitula yandi mosi. Beto ke mona yawu na kati-kati . . . Bika ti Nzambi kusala kima mosi samu na muntu mosi mpe kutinda yandi, beno ke mona muntu nionso ke meka na kumekula yawu. Beno me mona, ba ke na kumeka na kukitula bawu mosi. Muntu nyonso, “Mu salaka *yayi*. Munu, munu, denomination ya munu, munu, *yayi*,” bawu tulaka yawu mosi. Yinki beto ke na kulonga, samu na beto mosi to Kimfumu ya Nzambi?

¹¹¹ Tula Ndinga ya Nzambi. Basisa kukondwa lukwikilu mpe tula Kimfumu ya Nzambi na kati ya ntima ya muntu. Mpe Kimfumu ya Nzambi lenda ve kuvwanda na kati ya ntima ya muntu kaka kana ti Nzambi kusalaka muntu yina mutindu yina. Yandi lenda ve kukitula na . . .

¹¹² Mpe, beno bambuka moyo, kitini ya luvunu, yina bantu ke banzaka ti ya kele kieleka. Beno me mona. “Ya kele na nzila yina ke monana mbote samu na muntu.” Konso muntu ya mayele ke monana mbote.

¹¹³ Mutindu mu tubaka na beno mwa Balumingu me luta; ntangu mu telemaka pene-pene ya bébé ya munu yina vwandaka kufwa, mpe Satana telemaka kuna mpe tubaka, “Tata ya nge, yandi kufwaka na maboko ya nge na nkokila yina. Beno tala kento ya beno ya kulala kuna na—na yinzo ya bamvumbi, mpe awa kele bébé ya nge yina ke na kukwenda. Mpe nge lombaka Yandi na kupesa nge mvutu, mpe Yandi me benda ya nge. . . Yandi me benda kivudi na zulu ya nge. Ntangu yayi, mpe Yandi kele Nzambi ya mbote, mpe kasi beno tubaka ti Yandi vwandaka Munganga. Mpe beno, bayina kele ya kutelama samu na yina beno tubaka vwandaka kieleka, beno kele na foti.” Oh, ya kele samu na yina, ba-faculté ya yintu zolaka wisana ti ya vwandaka ya kusungama; mpe yandi vwandaka ya kusungama, mingi.

114 Mutindu mosi yandi vwandaka kaka ntangu yandi tubaka na Eve, “Meso ya nge ke zibuka, mpe nge ke zaba mbote na yimbi. Mpe beno ke vwanda mutindu banzambi, mutindu yina, na kuzabaka ti ya kele ya kusungama ve,” samu ti Nzambi bikaka ve bawu kumona bawu mosi dyaka, ti bawu vwandaka kinkonga. Na yawu bawu zabaka ti bawu zolaka zaba mbote na yimbi; mpe yandi vwandaka ya kusungama. Kasi, beno me mona, ya vwandaka ya kuswaswana na Ndinga ya Nzambi.

115 Mpe mutindu mosi ke salaka milongi na baseminere, ke longokaka théologie ya bantu; ya lendaka monana mbote, ya lendaka vwanda lubakusu ya mbote ya kima yayi, kasi ya kele luvunu.

116 Beto fwana bakula Yawu ve. Beto ke kwikila Yawu samu Nzambi me tuba ti ya ke mutindu yina, mpe yina ke sukisa yawu kukonda nsuka. Kima ya muvimba, ya kele mutindu ya kukwikila Yawu.

117 Oh, mutindu Eve ke na kulula samu na kuvwanda na Doctorat ya Philosophie, beno me mona, mutindu yandi ke na kulula na kuvwanda ya kulutila mayela na yina yandi vwandaka!

118 Beno tala mutindu nene, bakala na kento ya yandi. . . Ntangu yayi beno tala, bakala na kento, bawu zole kinkonga na nsaba ya Eden, Eden ya Nzambi.

119 Ntangu yayi mu ke sukisa. Mu tubaka Mu ke vingila fioti. Beno tala, beno tala mbote ntangu yayi, samu na kumanisa.

120 Beno fwanikisa yayi ntangu yayi, mutindu nene kele bakala mpe kento ya yandi, nyonso zole na Eden ya Nzambi, kukondwa kukatula mosi ya bilele na zulu ya bawu, mpe zabaka yawu ve. Samu na yinki bawu zabaka yawu ve? Samu bawu vwandaka ya kufika vwale na ba-sense ya bawu ya kinkonga, na nzila ya Vwale ya Santu, ya Mpeve-Santu. Ba lendaka talana mosi na yankaka, mpe ba zabaka ve ti ba vwandaka kinkonga. Bawu vwandaka ya kubumbama na Mpeve-Santu, na busantu. Bawu vwandaka ya kubumbama.

121 Vwale ya Nzambi, dyaka bubu yayi, lenda tala mpe kulula ve. Bawu ke balula yintu ya bawu. Ya kele Vwale ya Santu, beno me mona, Vwale ya Santu. Nzambi vwandaka na meso ya bawu. . . bawu zole vwandaka, mosi vwandaka bakala mpe yankaka vwandaka kento, mpe bawu zabaka ve ti bawu vwandaka kinkonga, samu busantu ya Nzambi vwandaka fika meso ya bawu na vwale. Beno tala, Nzambi bumbaka konsiansi ya bawu na disumu, na nzila ya Vwale ya Santu.

122 Mu ke zola ti beto vwanda na ntangu ya kuzonzila yawu, na mwa minuti fioti. Beno tala awa, “Samu yandi, musambidi na mbala mosi na kukumaka ya kuvedila,” Hébreux, “musambidi na mbala mosi na kukumaka ya kuvedila, yandi kele dyaka ve na konsiansi ya disumu.” Disumu me luta na yandi.

¹²³ Mu me kuwa Mpangi Neville kutuba, na suka yayi, muntu mosi lendaka yufula yandi samu na yinki mu longaka ve na Mpeve-Santu, samu na yinki mu salaka *yayi* ve. Yawu yayi. Mpeve-Santu kele ksalu na kati ya beno. Ya kele Luzingu, kuningana ya nzutu ve; ya kele ve mutindu mosi ya nzikisa ya nsuni. Kasi Yawu kele Muntu mosi, Yesu Klisto, Ndinga ya Nzambi me vwanda na kati ya ntima ya beno, samu na kukindisa Ndinga nionso ya nsungi yayi. Ya kieleka. Beno tala mbote Mpeve-Santu na ksalu, ve na mingi ya kulakisaka; kasi, na ksalu, yina Yawu ke salaka landila Ndinga.

¹²⁴ Beno tala ntangu yayi Mpeve-Santu, ya Ndinga ya Nzambi, vwandaka na bakala mpe kento kinkonga, mpe zabaka yawu ve. Wapi mutindu Luzingu ya kitoko, ya Ndinga; Nkuna, Ndinga!

¹²⁵ Nzambi tubaka, “Ya kele na yinti na kati-kati ya disamba, kento. Mpe na kati-kati ya disamba kele yinti yayi; beno simba yawu ve. Na yina, kilumbu beno ke kudia yawu, kilumbu yina beno ke kufwa.” Bawu vwandaka ya kubumbana na busantu na yawu, bawu zabaka kima mosi ve samu na yawu, bawu lungaka simba yawu ve.

¹²⁶ Bawu vwandaka ya kubumbana na vwale ya busantu. Bawu vwandaka na lukengolo na kati ya tenta ya Nzambi. Ba vwandaka ya moyo. Ba vwandaka ve na lufwa pene-pene ya bawu. Alleluia! Bawu vwandaka na zola ya kulunga mosi samu na yankaka, Luzingu ya kulunga samu na ntangu nyonso. Bawu vwandaka na zola ya kulunga, lubakusu ya kulunga ya zola ya Nzambi. Bawu vwandaka na Ndinga ya Nzambi, mpe zitisaka Yawu. Mpe bawu vwandaka zinga mpe na lukengolo na Eden ya Nzambi, na lufwa ve, na mutindu nionso, pene-pene.

¹²⁷ Na yina, Satana bakaka Eve samu na kuwa nsangu ya yandi ya mbote ya théologie, nsangu ya mbote ya luzabu, ya lukolo ya zulu mingi, ya zulu mingi, civilisation ya mbote mingi, malongi ya zulu mingi, mpe nionso yina; na yina ntangu yandi kumaka...yandi kutelamaka mpe kuwaka yandi minuti, na mabanza ya yandi (yina ba tumaka beto na kulosa), ntangu yandi kuzwaka yawu samu na kuwa yawu.

¹²⁸ “Ntangu yayi, beno tala awa, dibuundu kele *yayi-mpe-yina*. Ba me tula yawu kubanda ntama. Beto kele mosi ya mabuundu ya kulutila ntama na yinsi. Mfumu ya mbanza ke kwendaka.” Mu ke kipe ve yina ya kele, beno me mona. Kana ya ke telemina Ndinga ya Nzambi, ya ke telemina yawu. Yina kele mbeni ya beno. Nionso yina me telemina Ndinga kele mbeni ya beno.

¹²⁹ Nyonso yina kele samu na Ndinga kele mpangi ya beno ya bakala. Yandi kele kitini ya beno.

¹³⁰ Beno tala, yandi me katula Vwale ya Santu, samu na kumona kieleka yina vwandaka sexe; beno fwanikisa yawu, yina kieleka kulula zolaka sala. Yandi katulaka Vwale na meso ya yandi, kima ya santu yina Nzambi tulaka na zulu ya meso ya yandi.

Yandi zolaka luzabu, samu na kuzaba yina yawu vwandaka; na yawu yandi katulaka Vwale samu na kumona yinki yawu vwandaka. Yandi kuwaka dyabulu, mpe beno tala wapi kisika ya tulaka yandi.

¹³¹ Ba me sala mutindu mosi na konso nsungi yina landaka, na kundimaka ntangu nyonso lweka ya mayele; mpe me tunga ntangu yayi kimfumu ya Satana, luzabu, nkuna ya yandi yina yandi kunaka, mpe me sala ti yinza kuvwanda Eden ya lufwa.

¹³² Ntangu yayi beno tala. Ntangu yayi beno tala Apocalypse 3, Nsungi ya Dibuundu ya Laodicée. Beno ke banza yawu na mabanza ya beno.

¹³³ Ntangu yayi beno tala. Yandi, Eve, kele ntinu ya kento ya Satana. Beno me mona, Satana, nyoka, kumaka na Eve ntete Adam kuma na yandi. Beno me mona? Ya kele kieleka. Na yawu yandi vunaka yandi, beno me mona; na yawu Satana, nyoka, vwandaka bakala ya Eve ntete Adam kuzaba. Beno me mona, ba vunaka yandi. Biblia ke tuba ti yandi salaka yawu, mpe yandi zabaka ti yandi vwandaka kinkonga, na yina. Beno me mona?

¹³⁴ Ntangu yayi beno tala Nsungi ya Dibuundu ya Laodicée. Yandi, Eve, kele ya kuvwanda mutindu ntinu ya kento ya Satana. “Yandi kele mvwama na bima ya yinza; mpofo, kinkonga dyaka, mpe zaba yawu ve,” kaka mutindu ya vwandaka na Eden ya Nzambi. Kasi ntangu yayi, ve samu ti Vwale ya Santu kele na zulu ya kizizi ya yandi, kasi vwale ya kulula ya nzutu. Ti, yandi katulaka Vwale ya Nzambi ya Santu, mpe tulaka vwale ya luzabu, samu na kulula. Mpe ntangu yayi yandi kele na vwale ya kulula ya nzutu, ti yandi kele “mpofo” na yawu na kuvwandaka disumu. Yandi kele “kinkonga” na bala-bala, “mpe zaba yawu ve.” Yandi kele kento ya kindumba na bala-bala. Bakento na bakupe yayi, na meso ya Nzambi, kele kento ya kindumba, “mpe zaba yawu ve.”

¹³⁵ Beno tala, beno baka bakento ya beto. Ntangu yayi, kana beno zola mona mutindu dibuundu kele, beno tala mbote mutindu bakento ke na kusalaka. Yandi ke talisaka ntangu nionso dibuundu. Na Eden ya Satana, ya disumu mpe kukondwa lukwikilu, kubeba ya nsambulu; kimfumu ya kubeba. Na kisika ya kubaka Ndinga ya Nzambi, ba me baka malongi ya mayela ya kulongoka ya muntu. Na kisika ya kubaka Dibuundu, bawu bakaka organisation, mpe bawu ke na kunataka yawu na yintu mosi ya nene.

¹³⁶ Ntangu yayi beno tala, ya kubeba na kukondwaka kuzaba diambu. Beno kondwa yayi ve ntangu yayi. Dibuundu vwandaka na vwale yayi ya kulula. Beno tala yina ya me sala na yandi. Ya me—ya me bebisa yandi na kukondwa kuzaba diambu na luzabu. Beno me mona? Vwale ya Santu, yandi zabaka dyambu ve; na vwale ya kulula, yandi kele na luzabu. Yandi zaba ti ya kele kitoko. Yandi zaba yina yawu ke sala, beno me mona. Ya kele

mbuma, yinti ke vwanda na nsatu, ya kuvwanda na ndwenga mosi. Beno me mona? Yandi me beba na luzabu, na busantu na mvindu mpe na kulula, mpe na Luzingu na lufwa.

¹³⁷ Kimfumu yayi fwana kufwa. Kimfumu yayi ke kufwa! Nzambi ya Mazulu ke bebisa yawu na zulu ya ntoto.

¹³⁸ Beno tala, na kubeba yayi, ya kele ti bakala me kuma kento, mpe kento me kuma bakala, “mpe ba me zaba yawu ve.” Mbuma ya kieleka ke talisa Eden ya Satana, kana beno tala mbote na babala-bala bubu yayi, bantu ya beto ya bilumbu yayi.

¹³⁹ Beno tala, ya vwandaka Eve yina Satana sadilaka samu na kusumusa Adam na ngolo ya yandi ya kulula. Ntangu yayi mutindu mosi, ke na kusala kima mutindu mosi bubu yayi. Beno tala, bansuki ya kuzenga, kizizi ya kupakula, bilele yina ke lakisa nzutu, beno me mona, yandi ke salaka yawu, mpe yandi zaba ve ti mosi na mosi ya bima yina kele ya kuswaswana na Ndinga ya Nzambi. Kuzenga bansuki ya yandi, ke sala yandi kento ya kukondwa buzitu, kento ya kindumba. Kulwata bakupe, ke tula yandi na kati ya nsoni ya nene. Ke lwata ba-robe yina ke talisaka nzutu, ke sala yandi ndumba. “Mpe yandi zaba yawu ve,” ve samu na busantu ya Nzambi; samu na kulula ya Satana. Yandi salaka yandi. . . Kento ke nataka Adam ya yandi na kulula yandi.

¹⁴⁰ Yandi katulaka bilele yina Nzambi lwatisaka yandi, kuna na Eden, samu na nzietelo ya yandi na ntoto ya kuyuma—yayi. Yandi katulaka yawu. Yandi katulaka bilele ya yandi. Na yina, Nzambi lwatisaka yandi bampusu; yandi bandaka na kukatula yawu malembe-malembe, ntangu yayi yandi me vutuka na kisika yina yandi vwandaka na mbandukulu.

¹⁴¹ Ntangu yayi yandi me nata Adam ya yandi na kulwata ba sous-vetements ya yandi. Bakala mosi ke lwata mwa bakupe yina ya ntama ya bakento, mpe yandi ke basika awa, mu banza ve ti ya kele na bubakala mingi na kati ya yandi. Yandi kele bakala-kento ya kulutila nene yina mu zaba. Beno me mona? Beno me mona, yandi me nata Adam yina me beba na kusala mutindu yandi, beno me mona, yandi me lwata ba-sous-vetements ya yandi. Yandi monaka yina yandi lendaka sala kuna ntangu yandi katulaka bilele ya yandi nionso kasi na nsi ya ba-sous-vetement. Yina kele bakupe. Ya kieleka, yina kele ba sous-vetements, mpe tala Adam ya yandi ke na kulwata yawu ntangu yayi. Na yina, landila Ndinga ya ntete ya Nzambi, “Ya kele busafu samu na kento na kulwata bilele yina kele ya bakala, mpe bakala yina ke lwata bilele ya kento,” na Ndinga ya kisina. Beno banza na yawu!

¹⁴² Ntangu yayi, yandi me lwata ntangu yayi mikoto, mutindu kento. Yandi ke benda yawu na mbunzu ya yandi, yandi ke lwata bigudi. Ya kele diambu ya kulutila yimbi yina mu me monaka ntete ve na luzingu ya munu, ya kele kumona bana yina ya

babakala bubu yayi na mikoto ya kubenda na mbunzu mutindu *yayi*, bansuki ya kutula ntinta, bansuki yina ba me tula mukubu, na mwa peroxide, mpe ba ke tula mukubu na bansuki ya bawu, mpe ba ke balula yawu na bigudi, samu na kusala mikoto. Beno babakala-bakento ya nene! Ya kele kima ya mpasi na kutuba na chaire, kasi lufundusu ke bandaka na yinzo ya Nzambi. Beno zaba mpe ve kana beno kele bakala to kento. Mpe mu me bakula ti Basoda ya beto ya Etats-Unis ke basika na bakupe na bilumbu yina ke landa. Ya kieleka. Beno me mona yina kubeba kele? Ya kele bilele ya kento; yandi ke lwata mikoto mutindu kento.

¹⁴³ Kilumbu yankaka yina mu kwendaka kuna, na Howard Johnson; ve yayi kele awa, kasi mosi na nzila yina ke basika na mbanza. Mpe mu vwandaka kuna na kuyituka. Awa me kwiza mwana-bakala ya ntwenya, na yinwa ya yandi ya kuzibuka. Mpe yandi vwandaka na bansuki ya ndombe *awa*, mpe yandi bendaka yawu mutindu *yayi*; mpe yandi tulaka yawu bigudi, mpe yandi yokaka yawu, na zulu ya meso ya yandi; na kutalaka na zulu ya meso ya yandi, na kubalukaka. Kana mu me monaka ntete ve kubeba! Beno me mona, yandi zolaka kwikila yawu ve. Yandi zolaka talisa ti yandi kele bakala, kasi na mpeve ya yandi yandi kele kento. Yandi zaba ve wapi lweka ya yinzo yandi kele. Ya kele kieleka. Wapi mutindu ya kubeba!

¹⁴⁴ Ya kele yina Satana ke salaka. Yandi ke bebisaka bayinsi. Yandi ke bebisaka dibuundu. Yandi ke bebisaka bantu. Yandi kele muntu ya luvunu, muntu ya luvunu ya Kieleka ya kisina.

¹⁴⁵ Nzambi salaka bakala bakala. Yandi salaka kento kento. Mpe Yandi lwatisaka bawu na mutindu ya luswaswanu, mpe Yandi zolaka ti bawu bikana mutindu yina mpe kusala mutindu yina; mosi kele kento, mpe yankaka kele bakala. Yandi kabulaka Adam na disamba ya Eden, mpe salaka yayi, kabulaka Eve na yandi.

¹⁴⁶ Ntangu yayi yandi ke lwata mikoto ya yandi; yandi ke zenga bansuki ya yandi mutindu bakala, mpe yandi ke meka na kulwata mutindu kento. Beno me mona? Yandi ke lwata kale bilele ya yandi ya ngaanda, mpe yandi ke lwata kale bilele ya yandi ya kati. Ntangu yayi, ya ke monana kuvweza, kasi mu zola tuba yawu ve mutindu yina. Ya kele Kieleka ya ntelamanu ya Nsangu ya mbote. Kana beno zaba yawu ve, na yina ya kele na kima ke tambula ve mbote na beno; beno kele mpofu to ata mbala mosi ve beno me vwandaka na nzila. Mpe kento ke banza mpe bakala ke banza ti ya kele kieleka, ba ke na kuwisanaka.

Bakento ke tuba, “Mbote, ndungutila kele mingi!”

¹⁴⁷ Ba-Indien Apache ya ntama kuna ke pesa beno nsoni. Tiya mingi bawu ke kuzwa, bilele ya kulutula bawu ke lwata, samu na kubika mwini na zulu ya bawu; oh, beno sala yawu mutoki, na yawu beno lenda kuzwa mupepe na yina bawu ke na kutambula. Beno me mona? Bawu ke telama kaka na ngaanda ya mwini.

148 Beno lendaka ve kuvibila yawu; beno ke yokama mpe beno ke zika na tiya. Kasi, beno me mona, ya kele yina beno ke bokilaka malongi ya zulu mingi. Science ya bilumbu yayi me basisa yayi. Oh, la la! Yandi yayi, “kinkonga,” na Laodicée, “mpe yandi zaba yawu ve.”

149 Yandi vwandaka kinkonga na Eden. Beno me mona bimfumu zole mutindu mosi? Mosi kele ya disumu mpe ya lufwa, yankaka yina kele Luzingu mpe ludedomo. Na kati kuna yandi vwandaka ya kufuka na Vwale ya Santu. Bawu zole vwandaka kinkonga; bawu zabaka yawu ve. Bawu zabaka kima mosi ve samu na yawu, samu bawu vwandaka ya kubumbama na Mpeve ya Nzambi.

150 Mpe bawu me bumbama na bansatu, mpe bawu ke tala mosi na yankaka na . . . Beno me mona, Adam lendaka tala na Eve, mpe yandi zabaka ve ti yandi vwandaka kinkonga. Kasi ntangu yayi na vwale ya kulula yayi, yandi zaba ve ti yandi kele kinkonga, kasi yandi ke salaka yawu na yisi ya vwale ya kulula yayi samu na kusala bakala kutala yandi. Ya kele kaka kima yina yandi lenda sala yawu. Beno ke kwikila yawu ve, kasi beno ke sala yawu na mutindu nionso, mpe bakala ke tala. Mpe yandi monaka ti beno kele na kubenda mingi, tii yandi ke kwiza mpe ke tula ndambu ya bilele ya beno na zulu ya yandi mosi.

151 Oh, wapi kubeba! Wapi nsungi! Wapi ntangu beto kele. . . Wapi mutindu luvunu ya kele! Oh, bima nyonso yayi, “mpe zaba yawu ve,” mpeve ya kulunga yina ba bebisaka kele na kati ya muntu. Yandi me bumbama na kulula ya Satana, mpe kento kele, mpe. Ya kele mpeve ya satana ya kimvuka ya nene. Beno me mona, bawu zaba ve, kasi bawu kele organisation. Bakento na bakupe, kele ya organisation. Muntu yina me lwata mutindu yina, kele na organisation. Mu ke pesa beno bunkufi ya yawu, B.S.S., Big Sister Society [Société ya Bampangi-bakento ya Mbuta—Mu.], ba kele ya kimvuka yina. Ba ke kwenda kuna, kimvuka ya nene ya babakala-kento, na mwa mutindu ya pantalon, mwa mutindu ya kifwani mosi ya nene, yina kele mvindu na kutala. Mu—mu. . .

152 Muntu, ntangu yayi beno lendaka swaswana na munu na yayi, kasi ya kele Kieleka. Beno me beba mpe beno me zaba yawu ve. Beno kele ve, beno sala diaka ve mutindu muntu. Beno me mona, me kuma pete-pete; mpe, mwana ya bawu ya bakala, ke vwanda dyaka ve na kima na bawu; babakala, mpe bakento, mpe. Bawu kele kimvuka. Ya kele na organisation. Samu na yinki? “Jean, kielo yina ke landa, me lwata bakupe, na yawu samu na yinki mu lenda ve? Luella zolaka ti mu lwata yawu samu ti Jean lwataka yawu, kyelo yina ke landa. Mpe, mbote, kana—kana Suzie Jane lendaka lwata yawu, na yawu Marthe Jane ke lwata yawu, to Suzie Lou,” to muntu nyonso yina nkumbu ya yandi kele, beno me mona. Beno me mona, ya kele kimvuka mosi.

Ya kele organisation. Beno kele ya kimpeve na kati ya yawu, mpe beno zaba yawu ve.

¹⁵³ Mpe kana ya kele mutindu yina, mpe beto ke mona ti ya kele mutindu yina, mutindu mosi beno kele ya kufwa meso. Beno kele ya kufwa meso na ba-denomination yayi yina Satana me kotisa beno. Mpe ya kele kubeba ya Ndinga ya Nzambi ya ntete, mpe ya Kimfumu ya Yandi, mpe dikani ya Yandi samu na bana ya Yandi. Satana me kotisa babakala mpe bakento na bima yayi, mpe bawu zaba yawu ve. Muntu ya kubeba!

¹⁵⁴ Ya kele dyaka ve mwana ya Nzambi! Na mikoto ke kulumuka na mbunzu ya yandi, yandi me lwata bakupe, yandi ke tambula mutindu yina na bala-bala; mwana ya Nzambi, diacre na kati ya dibuundu, pasteur na chaire? Ve, yina kele ve mwana ya Nzambi. Yandi kwisaka ata fioti ve na nzila ya Kiyungulu ya Nzambi yina ke banzaka. Yandi zolaka ve kulwata bilele ya bakento; ya kieleka yandi zolaka ve; to yandi zolaka ve kulwata bilele ya bakala. Beno me mona, ya kele ve mwana ya Nzambi. Ya kele mwana ya Satana, mpe mwana ya kento ya Satana. Kima ya mpasi na kutuba!

¹⁵⁵ Satana me nunga na kubeba mpe me yala na yinza yayi, mpe me sala yawu kimfumu ya yandi; ba tulaka muntu yina, na kimpwanza ya kusoola, samu na kusola bawu mosi yina vwandaka na nsatu ya luzingu. Mpe yina ke lakisa yina kele na kati ya ntima ya beno. Beno me mona? Ndinga na nge . . . Nge zaba yinki? Bisalu na nge ke tuba ngolo mingi, yawu ke kufwa ndinga na nge. Uh-huh!

¹⁵⁶ Bika mu kwenda na muntu mosi. Mpe mu tuba, "Oh, mu . . . Beto nionso kele Baklisto. Beto kele ya dibuundu." Mpe ba-stripteaseuse yina vwandaka kuna na bureau ya yandi? Huh! Ya ke sala ata luswaswanu ve na yina yandi tubaka na munu, mu ke zaba ya kulutila mbote; mutindu mosi na beno.

¹⁵⁷ Ti kento tuba ti yandi kele Muklisto, na nsuki ya nkufi? Huh-uh! Beno zaba ya kulutila na yawu, beno me mona. Yinga, tata. Bika yandi tuba ti yandi kele Muklisto, yina me pakula mukubu mpe yina ke pakula, mpe yina ke lwata bakupe, mpe yandi tuba ti yandi kele Muklisto? Beno zaba ya kulutila na yina. Ndinga ya Nzambi ke longa beno mbote kulutila yawu. Ndinga me tuba ti yandi lenda ve kusala yawu mpe kuvwanda Muklisto. Yandi kele kukondwa buzitu, mpe nyonso. Wapi mutindu Nzambi ke tula kima ya kukondwa buzitu na kati ya Kimfumu ya Yandi? Ve, tata, ata fyoti ve. Ve, tata. Bawu mosi, bawu ke lakisa nsatu ya bawu.

¹⁵⁸ Beno lenda ve kubaka yembe samu na kudya na buse, ata fyoti ve. Yembe ke vwandaka na ndulangundu ve. Yandi lenda ve kudya ya kibulu ya ntama ya kufwa. Kana yandi meka na kudya yawu, ya ke kufwa yandi, mpe yandi zaba yawu. Kasi buse lenda

kudia konso kima yina yandi zola. Beno me mona? Yandi kele na mingi ya ndulangandu.

¹⁵⁹ Na yina beno ke mona, ya kele mutindu yina na yinza bubu yayi, kima mutindu mosi, “Bawu kele kinkonga, mpofo, mpe zaba yawu ve.”

¹⁶⁰ Satana salaka yawu na nzila ya kulula ya kento samu na luzabu, samu na sexe, na yina yandi solaka na nzila ya kusola ya yandi mosi. Ntangu yayi beno tala, ya vwandaka Eve yina twadisaka Adam na yimbi, mpe ya vwandaka kento yina katulaka bilele ya yandi na ntuala ya Adam katulaka yandi. Beno me mona? Ya kele kento, ntangu nyonso. Ya ke vwandaka ntangu nyonso. Ya kele dyaka mutindu mosi.

¹⁶¹ Ya kele dibuundu yina ke twadisaka muntu na nzila ya yimbi. Ya kele dibuundu, beno me mona, yina ke twadisaka muntu yina zolaka vwanda mwana ya Nzambi. Ya kele kento, dibuundu. Biblia ve, Nzambi, samu ti Biblia kele bakala. Oh, yinga, “Ndinga kumaka nsuni,” mpe Yandi vwandaka Muntu. Beno me mona? Biblia kele bakala; dibuundu kele kento. Beno me mona? Ya kele ve dibuundu. . .Biblia yina ke twadisaka muntu na nzila ya yimbi. Ya kele dibuundu yina ke twadisaka yandi na nzila ya yimbi. Ya kele dibuundu yandi me kwenda kinkonga, Biblia ve. Beno me mona? Ve, ya kieleka. Biblia ke tuba na yandi ti yandi kele kinkonga. Yinga, tata.

¹⁶² Ntangu yayi beno tala mutindu, na nzila ya sexe, nsatu sexe, yandi kulula samu na luzabu, samu na kuzaba yinki *yayi* vwandaka, mpe wapi mutindu, kana mbuma yayi vwandaka mbote to ve. Mpe yandi salaka yawu.

¹⁶³ Nzambi ke vutula yawu kilumbu, ata ti, na nzila ya Bakala. Ya pesamaka na nzila ya kento. Kasi ya vwandaka ya kuvulusa na nzila ya Muntu; Muntu, Yesu Klisto, yina kele Ndinga.

¹⁶⁴ Mpe na yina yinki ya kele? Beno tala, na kumanisa. Awa ntama mingi ve, mu salaka nsamunu yayi. Mu kele dyaka na bapage yiya to tanu na kati kuna, kasi mu. . .ya Masonuku mpe nyonso yina mu zolaka kutala. Kasi, beno kuwa. Beto sukisa, na kutubaka yayi.

¹⁶⁵ Beno bambuka moyo, awa ntama mingi ve, mu vwandaka longa beno na zulu ya Bampungu Sambwadi, *Feti Ya Bampungu*, mpe nyonso yina. Mpe mu tubaka, “Ya kele na nkinzi ya kilumbu ya nana.” Na yawu, kilumbu ya sambwadi ke vwanda ya nsuka, yina ke vwanda Millenium. Kasi ya kele na nkinzi ya nana; yina, kana ya vwandaka ya nana, mpe ya kele kaka na bilumbu sambwadi, ke sala dyaka yawu kilumbu ya ntete, ke vutuka kaka na kilumbu ya ntete. Na yina, na manima Millenium ke suka, na yina ya ke vwanda diaka na Eden mosi. Kimfumu ya nene ya Nzambi ke vutuka. Samu, Yesu nwanaka yawu na Satana, na disamba ya Gethsémané, mpe bakaka Eden, yina Yandi me kwenda samu na kukubama na Mazulu, samu na kuvutuka

dyaka, na Mazulu. Yandi tubaka, “Ti bantima ya nge kuvwanda na kidi-kidi.”

¹⁶⁶ Ntangu Yandi vwandaka awa na zulu ya ntoto, Yandi tubaka, “Beno, beno ba-Juif, beno me kwikila na Nzambi. Ntangu yayi, mu zaba ti mu kele na nkumbu ya yimbi,” Yandi tubaka. “Mpe ba ke tuba ti Mu kele *yayi, yina*. Kasi, beno me kwikila na Nzambi; mpe mutindu beno me kwikila na Nzambi, beno kwikila mpe na Munu.” Yandi vwandaka Nzambi, yina me monisama. Beno me mona? “Beno kwikila mpe na . . .”

¹⁶⁷ “Na yinzo ya Tata ya Munu kele mingi. . .” To, “Na ekonomi ya Tata ya Munu, na makani ya Tata ya Munu ya kele na bayinzo mingi. Mu ke kwenda samu na kuyidika kisika mosi.” Beno tala bantangu yikwa ya ke vwanda: bakilometele bankama yiya na makumi yiya na yiya! Beno tuba, wapi kisika ya kele? Yandi me kwenda samu na kuyidika yawu. Yandi kele Mvangi. Yandi ke salaka wolo nyonso yina. Babala-bala kele ngolo. Yandi kele Mvangi. Yandi ke na kuyidika kisika mosi. Kuna na Apocalypse 21, yandi tubaka, “Mpe Munu Jean monaka Mbanza ya santu, Jérusalem ya Malu-malu, ke kulumuka na Nzambi na Mazulu.”

¹⁶⁸ “Ya vwandaka dyaka ve na mubu; mazulu ya ntete mpe ntoto ya ntete lutaka.” Yinki vwandaka mazulu ya beto ya ntete? Ya vwandaka Millenium. Yinki kele ntoto ya ntete? Ya vwandaka mutindu yayi. Ya ke soba dyaka. Kaka mutindu ba botikaka yawu na Noé, na bilumbu ya malongi ya yandi; vwandaka ya kusantisama na Klisto, mutindu Yandi mwangisaka Menga ya Yandi na zulu ya yawu; mpe kuvutula ya malu-malu, kubaka bankuna nyonso mpe nyonso na yawu, na kuvutula ya malu-malu na nsuka, na mbotika ya Tiya yina ke kufwa konso germe, konso kimbevo, konso maladi, konso mvindu yina vwandaka ntete na zulu ya ntoto.

¹⁶⁹ Yandi ke pasuka, mpe ke basisa Ntoto ya Malu-malu. “Mpe mu monaka Mazulu ya Malu-malu mpe Ntoto ya Malu-malu. Mazulu ya ntete, ntoto yayi ya ntete, lutaka; mpe ya vwandaka dyaka ve na mubu. Mpe munu Jean monaka Mbanza ya santu, Jérusalem ya Malu-malu, kukulumuka na Nzambi na Mazulu.” Kuna Nzambi ke vwanda na binama ya Yandi ya kieleka, bana ya babakala mpe bana ya bakento, kisika Yandi lenda vwanda na ngwisani na bawu na busantu, na meso ya bawu ya kufwa na konso disumu. Disumu ke vwanda diaka ve.

¹⁷⁰ Beto sala ngolo; beno kuvunama ve na kilumbu yayi, kasi, “kunwana samu na kukota na mwelo.”

¹⁷¹ “Samu bayina nionso ke bikana na ngaanda ke vwanda bantu ya kindumba, bantu ya bansatu ya yimbi.” “Muntu nyonso yina ke tala kento samu na kulula yandi me sala ntete pité na yandi.” Nyonso na . . . na ngaanda ke vwanda bakento ya luzingu ya yimbi, babakala ya luzingu ya yimbi, mpe nyonso yina.

¹⁷² Mpe kaka bayina me vuluka, mpe na Buku ya Luzingu ya Mwana-dimeme, ke kota na mwelo. Na yina beno sala ngolo, bankundi; beno kuvunama ve na kilumbu yayi ya nsuka.

¹⁷³ Yayi kele ntangu ya nene. Muntu nionso kele na mbongo. Muntu nionso lenda sala *yayi*, mpe muntu nionso lenda sala *yina*, mpe mbongo ke tambula bisika nyonso, mpe matoma ya nene, mpe nyonso. Ya ke vwanda ve na mosi ya bawu na Mbanza yina. Ya ke vwanda ve na ditoma mosi, mpepo mosi. Ve. Ya ke vwanda kaka civilisation ya mutindu yankaka. Ya ke vwanda diaka civilisation ya luzabu ve, ya science ve, kasi ya kukondwa kifu, mpe lukwikilu na Nzambi ya moyo.

¹⁷⁴ Beto sala ngolo samu na kukota na Yawu. Samu ti yina kele lukanu ya munu ya muvimba, ya kele kukota na Mbanza yina kilumbu mosi; mpe beno tala kaka na manima, na kukwizaka na munu, beno mona mosi na mosi ya beno kutambula, ntangu beto ke yimba, “basantu ke kota na kutambulaka na kati.” Mu zola vwanda na lutangu yina ntangu basantu ke kota na kutambulaka.

Beto sambila.

¹⁷⁵ Tata ya Mazulu ya luzolo, na yina bilumbu ke na kubelamaka, mpe beto ke mona yawu kubelama, nsilulu ke na kubelama. Beto ke sambila, Nzambi ya Luzolo, ti Nge ke tula yawu na zulu ya bantima ya beto, na yawu beto ke sala ata foti ve. Nzambi ya luzolo, bumba konsiansi ya beto ya kuvedila. Bumba bantima ya beto ya kubumbama, Mfumu, meso ya beto ya kubumbama na bima ya yinza, mpe bima ya mpamba ya yinza, nkembo ya mpamba samu na kukuma muntu mosi ya nene.

¹⁷⁶ Ata ti bawu kele nene, bantinu nionso, ba-monarque, bapotentat, mpe bima yankaka nionso ke kufwa, mpe ba ke telama ve na kinswe- . . . na mvumbukulu ya ntete. Samu ti ya kele ya kusonama, “Ya sakumuka mpe santu kele yandi yina kele na ndambu na mvumbukulu ya ntete, na yina lufwa ya zole kele na ngolo ve.” O Nzambi! “Lufwa ya zole,” lufwa ya kimpeve, “kele na ngolo ve”; yandi kele ya kuvulusa!

¹⁷⁷ O Nzambi, na kubanza ti mosi ya bangunga yayi, mosi ke kwisa kutala yankaka, mpe ke zanguka. “Zole na mbeto, Mu ke baka mosi, Mu ke bika mosi. Zole na bilanga, Mu ke baka mosi, Mu ke bika mosi.”

¹⁷⁸ O Nzambi, sadisa beto na kuvwanda ya kuvedila na—na meso ya Nge, Mfumu, ata yina muntu ke banza samu na beto, yina bantu yankaka ke tuba. Mfumu, ti ya beto ya santu. . . kundima ya beto kuvwanda ya santu. Ti ya vwanda na nsungi na Ndinga ya Nzambi, na mutindu ya kulunga, Mfumu, ti ya kele ve na ata luvunu yina kele na kati ya beto. Na yina beto ke dodokila, na kati ya bafoti ya beto, ti Menga ya Yesu Klisto ke telama na kati-kati ya beto mpe Nzambi, ti Yandi ke tala na beto na nzila ya Menga ya Yesu; ve na zulu ya kusungama ya beto mosi, to nani

beto kele, yina beto me sala, kasi na zulu ya makuki ya Yandi kaka. Nzambi, pesa yawu!

¹⁷⁹ Bika ti muntu mosi ve yina me vwanda awa na nkokila yayi mpe kuwa Nsangu, bika ti mosi ve na kati ya bawu kuzimbana, kubanda na mwana ya fioti na muntu ya kulutila kiboba. Bika ti nsatu ya bawu ya santu kuvwanda kaka samu na Nzambi mpe Ndinga ya Yandi. Beto zaba ve wapi ngunga Yandi lenda monika, to wapi ngunga Yandi lendaka bokila beto na kupesa mvutu kuna na Lufundusu. Beto me zaba ve wapi ngunga Yandi lendaka, mutindu ya vwandaka, samu na kubaka kalati ya beto na port, tuba, “Ya kele ntangu ya kuvutuka na yinzo. Nge fwana kwenda.” Nzambi, sadisa beto na kuvwanda ya kuvedila. Pesa yawu, Mfumu.

¹⁸⁰ Ti beto zinga tii Nkwizulu ya Mfumu, kana ya lendaka salama. Bika beto sala nionso yina kele na ngolo ya beto, na zola mpe lubakusu, na kubakulaka ti Nzambi ke na kusosa yinza, bubu yayi, na kuzwa mameme nyonso ya kuzimbana. Mpe ti beto zonza na bawu na kisambu ya kulunga ya zola mpe Ndinga ya Nzambi, ti beto lenda tala yina ya nsuka, na yina beto lenda kwenda na Yinzo, mpe kubasika na Eden yayi ya ntama ya Satana awa, Mfumu.

¹⁸¹ Yina kele nyonso ya kutungama na zulu ya kulula, mpe bakento ya kitoko, mutindu bayayi yina ba me bokila na yinza, na bansangu ya bawu kuna, “Beto ke pesa bansangu, mpe beto zola bana ya babakala kukwiza na confiture na bizizi ya bawu, mpe bana ya bakento ya kitoko me kulwata bakupe,” kaka na ba-radio mpe ba-télévision; mpe mutindu nionso ya bima ya mvindu mpe ya nzanzi, mpe ya Hollywood; mitindu nyonso ya ba-robe yina ke lakisaka nzutu, ya mvindu, ya busafu samu na bakento. Mpe—mpe babakala yina ke na kubeba mpe ba ke lwata bilele ya bakento yina ke zengaka ndefi, mpe ke zenga bansuki ya bawu mutindu bakento; mpe bakento mutindu babakala.

¹⁸² O Nzambi, wapi ngunga ya mpasi beto ke na kuzinga! Oh, kwiza, Mfumu Yesu, kwiza! Kwisa, Mfumu! Sukula beto na nzila ya Menga. Katula mvindu nionso mpe luvunu na beto. Ti beto zinga, Mfumu, ti beto kuzinga na yisi ya Menga, ntangu nyonso, na ntwala ya Nge. Ya kele nsatu ya bantima ya beto, mpe lusambulu ya beto ya kieleka.

¹⁸³ Nzambi ya luzolo, me lala na zulu ya p-. . .to na ntwala ya bantu yina, na nkokila yayi, kisika Nsangu ya mbote me tulama. Mfumu, awa kele na bamuswale mpe mwa mabuki yina ke kwendaka na bambevo mpe bantu ya mpasi. Ti kisambu ya lukwikilu, Mfumu, kubwa na bantima ya beto ntangu yayi, na meso ya Nge. Na yina, Mfumu, kana ya kele na kima ya mvindu na kati ya beto, Mfumu, baka ya beto. . .nata beto na lufundusu ntangu yayi; mpe beto ke lomba kyadi. Talisa na beto yina beto ke na kusala yimbi, Mfumu, na yawu beto lenda lomba, na kubaka

Menga mpe kusukula beto. Belusa bantu yayi ya kubela mpe belusa bawu, Tata, na nyonso yina ya ke kwenda, na kisika nyonso bawu ke kwenda. Bika ti ya vwanda mutindu yina, Tata.

¹⁸⁴ Pesa beto dikani ya kusadila Nge, mpe Nge kaka. Pesa yawu, Mfumu.

¹⁸⁵ Pesa lukengolo na bantu yayi ya luzolo yina kele na nzila ya yinzo.

¹⁸⁶ Matondo na Nge samu na mutindu Nge me belusa bantu. Mpe mwana ya bakala ya Mpangi-kento Shepherd mpe Mpangi Shepherd, yina lwalaka na velo, mu ke sambila ti yimbi mosi ve kukwisa ke landa yawu; mwana-bakala ya fioti yina vwandaka tambula na velo, mu ke sambila ti yandi ke beluka. Beto ke tonda Nge samu na kubeluka ya Nge na bantu yankaka yayi yina beto me lomba. “Mpe beto zaba ti yina beto ke lomba, beto ke kuzwa, samu ti beto kele na kivuvu na Yandi yina salaka nsilulu.”

¹⁸⁷ Pesa beto lemvo ya Nge, Mfumu, mpe lemvo kila beto masumu ya beto. Beto me lomba, na Nkumbu ya Yesu Klisto. Amen.

¹⁸⁸ Beno zola Yandi? Beno ke kwikila na Yandi? Beno kele ya kubela mpe ya kulemba na kimfumu ya Satana? Beno ke kwikila ti ya ke na kwiza na Millenium, na Millenium ya Yandi; ya Yandi, na Eden ya Yandi? Nge ke kwikila ti ya me salama bubu yayi?

¹⁸⁹ Beno tala, nyonso kele ya kuvwanda na zulu ya mayela. Nyonso, nyonso, fwana talisama na mutindu ya science ntete bawu kwikila yawu.

¹⁹⁰ Mpe beno lenda lakisa ve na nzila ya science Nzambi. Beno fwana ndima Yandi na nzila ya lukwikilu, “Samu ti yandi yina ke kwiza na Nzambi fwana kwikila ti Yandi kele, mpe muntu yina ke pesaka musendo na bayina ke sosaka Yandi.”

¹⁹¹ O Nzambi, mu zola zaba kima ve kasi Menga ya Yesu Klisto yina ke sukula munu na disumu. Mu zaba kima yankaka ve kasi Yesu Klisto. Mpe mutindu Paul tubaka na ntama, na yina mu ke tuba na nkokila yayi, “Mu zaba kima mosi ve na kati ya beno, kaka kuvulusa Yesu Klisto, mpe Yandi komaka na kulunsi.”

¹⁹² Ya kele nyonso mu zaba na kutuba na beno. Ti, Biblia yayi, mu ke kwikila na ntima ya munu nyonso (kana mu zaba ntima ya munu), samu na kuvwanda Ndinga ya Nzambi ya kulunga ya kukondwa mvindu. Na nzila ya Yayi mu ke zinga. Na nzila ya Yayi mu me telama. Mpe kana mu vwandaka na baluzingu mafunda, mu ke zola kupesa konso kitini ya yawu samu na Ndinga yayi, samu ya kele Ndinga ya Yesu Klisto. Mpe mu ke kipe ve lutangu yina ba lenda meka na kutelmina Yawu, lutangu ya science ke meka na kutuba ti Yawu kele ve ya kutudila kivuvu, mpe nyonso yina, samu na munu, Ya kele kaka kima mosi na yinza mu lenda tula kivuvu, ya kele Ndinga yayi. Yandi kele ya munu. Mu zola Yandi. Beno ve?

193 Kana ya kele na disumu na kati ya ntima ya beno, kana ya kele na foti na ntima ya beno, kana beno kele na kima mosi, beno sambila ntangu yayi mpe beno lomba na Nzambi na kulemvokila beno. Beno sambila samu na munu; mu ke sambila samu na beno. Nzambi sakumuna beno, ya kele kisambu ya munu.

Tii beto ke kutana! tii beto ke kutana!
Nzambi vwanda na beno tii beto ke kutana
dyaka!

194 Beno zola mosi na yankaka? Jean tubaka, “Bana ya fioti, beno zola mosi na yankaka.” “Beno zola mosi na yankaka, samu zola ke fikaka masumu mingi.” Ntangu yayi beto pesana mbote mosi na yankaka.

Nzambi vwanda na beno tii beto ke kutana
dyaka!

Tii beto ke kutana! tii beto . . .

195 Ntangu yayi beno vwanda mbote samu na mosi na yankaka. Beno vwanda mbote samu na muntu nionso. Sala mbote na mfinangani ya nge. Beno vwanda kukondwa ditono tii Yesu ke kwisa.

. . . makulu;
Tii beto ke kutana! tii beto ke kutana!
Nzambi vwanda na beno tii beto ke kutana
dyaka!

196 Beno zola Yandi? Yina kele kisambu ya munu. Beno sambila samu na munu; mu ke sambila samu na beno. Mu fwana vutuka na Tucson ntangu yayi. Mpe mu—mu ke sambila ti Nzambi ke sakumuna beno nionso. Mu ke kwenda katuka kuna na Canada, mpe na manima na Colorado; na ziunga, na ziunga, beno me mona. Tii . . .

197 Mpangi Tony kele kuna, mpe kima ya nene me salama. Kaka na nsi ya Vatican, na Rome, ba ke na kubokila reveil, lukutakanu mosi, samu na munu na kukwisa kuna mpe kusala balukutakanu ya reveil na Rome, na Rome. Yandi me vutuka kaka. Bantu nionso kele kintwadi. Ba kele na stade ya nene kuna, na bakiti mafunda mpe mafunda, mpe bawu zola ti mu kwiza samu na reveil. Bawu zola kumona nkembo ya Mfumu na ministere. Mu zaba ve. Mu fwana sambila samu na yawu, kumona yina Mfumu ke tuba na munu. Oh, la la! Beno bambuka moyo, beno sambila, beto nyonso kintwadi. Beto kele yinki?

Beto ke vingila nkwizulu ya Mvulusi ya beto ya
kusakumuka,
Beni tala, mpe beno tala matiti ya fike ntangu
yayi kukuma ya mubisu;

Nsangu ya mbote ya Kimfumu ya Yandi me
kwenda na bayinsi nionso;
Mpe beto me kuma pene-pene ya nsuka, beto
lenda monana.

198 Ya kele kieleka?

Na yina na kiese beto ke mwangisa nsangu ya
kumonana ya Yandi ya lusakumunu,
Ntama mingi ve Yandi ke kwiza na nkembo,
samu na kutuba na mosi mpe nyonso;
Na yina beno vumbuka, beno basantu ya
Mfumu, samu na yinki ngonda ya kumi
ntangu nsuka ke kuma pene-pene,
Beto kubama samu na lubokilu ya nsuka.

199 Yandi ke baluka na wesete mpe ke vutuka diaka na mpunda,
mosi ya bilumbu yayi, beno bambuka kaka moyo. Ya kieleka
yandi ke sala yawu. Mpe ya kieleka. Tii kuna:

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesa beno nsayi mpe kikesa,
Beno baka Yawu, bisika nionso beno ke
kwenda.

Nkumbu ya ntalu, (Nkumbu ya Ntalu!) O
Nkumbu kitoko!

Kivuvu ya ntoto mpe kyese ya Mazulu;
Nkumbu ya ntalu, Oh Nkumbu kitoko!
(Nkumbu kitoko!)

Kivuvu ya ntoto mpe kyese ya Mazulu.

Beto ke fukimina Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,

Ntangu nzietolo ya beto ke suka.

Nkumbu ya ntalu, Oh Nkumbu kitoko!
Kivuvu ya ntoto mpe kyese ya Mazulu;
Nkumbu ya ntalu, Oh Nkumbu kitoko!
Kivuvu ya ntoto mpe kyese ya Mazulu.

200 Ntangu yayi, na nzila ya nsuka yayi, beto yimba yawu na
bantima ya kukulumusa ntangu yayi.

Baka Nkumbu ya Yesu na nge,
Mutindu Kinwaninu ya ngolo;
Mpe na ntangu mpukumunu ke kwisa, (Bima
yayi ya kimfumu ya Satana, beno me mona,
beno me mona.)
Beno niunguta kaka Nkumbu yina ya Santu na
kisambu.

²⁰¹ Kaka yina; na manima beno kwenda. Ya ke sala bisalu. Mu me meka yawu. Beno kwikila yawu kaka ntangu yayi, samu ya ke sala. Niunguta kaka Nkumbu ya Yandi ya Santu na kisambu.

. . . Nkumbu ya Yesu na nge,
Mutindu Kinwaninu ya ngolo;
Ntangu bampukumunu ke kwisila nge, (Na yina yinki beno ke sala?)
Beno niunguta kaka Nkumbu yina ya Santu na kisambu. (Vwale ke kwiza na kizizi ya beno kuna.)

Nkumbu ya ntalu, (Nkumbu ya Ntalu!) O Nkumbu kitoko!

Kivuvu ya ntoto mpe kyese ya Mazulu;
Nkumbu ya ntalu, Oh Nkumbu kitoko!
Kivuvu ya ntoto mpe kyese ya Mazulu.

²⁰² Beto kulumusa bayintu ya beto ntangu yayi, na yina mu ke lomba na Mpangi Beeler kuna na manima na kukwisa awa na estrade. [Mpangi Branham ke niunguta *Baka Nkumbu Ya Yesu Na Nge—Mu.*]

Niunguta kaka Nkumbu ya Yandi ya Santu na kisambu.

²⁰³ Nge ke sukisa beto, Mpangi Beeler. Nge ke sukisa beto na bisambu.

(Nkumbu ya ntalu!)
Kivuvu ya ntoto mpe kyese ya Mazulu;
Nkumbu ya ntalu, (Nkumbu ya Ntalu!) O Nkumbu kitoko!

Kivuvu ya ntoto mpe kyese ya Mazulu.

²⁰⁴ Ntangu yayi na bayintu ya beto ya kukulumusa, mpe bantima ya beto ya kukulumusa. Mpangi Beeler, mosi ya ba-associé ya beto awa, Mpangi Estle Beeler, mpangi ya bakala ya Muklisto ya mbote, muntu ya kukwikama. Mu ke lomba yandi kana yandi ke bika bantu, na nkokila yayi, na bisambu. Nzambi sakumuna nge, Mpangi Beeler.



EDEN YA SATANA KNG65-0829
(Satan's Eden)

Nsangu yayi ya Mpangi William Marrion Branham, kulongamaka na Kingelesi, na Lumingu na nokokila, na kilumbu ya 29 ya Ngonda ya nana, na mvula 1965, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org